

समर्पण पत्र



डॉ० बंसी लाल शर्मा

समर्पण पत्र

(१९५०-५१)

श्री बंसी लाल शर्मा

समर्पण पत्र

(कविता-संग्रह)

डॉ० बंसी लाल शर्मा

प्रकाशक

अंजु प्रकाशन

संतरा मोड़ (पौनी चक), पो० ऑ० अकलपुर

जम्मू (जे. एण्ड के.)

फोन-94197-89332

SAMARPAN PATTAR

(Kavita Sangreh)

by

DR. BANSI LAL SHARMA

आर्थक सहायता गितै लेखक जम्मू-कश्मीर कल्चरल अकैडमी
दा धनवादी ऐ। इस पोथी दियें कमियें-बुट्टियें दा लेखक आपूं
जिम्मेवार ऐ। इस कन्नै अकैडमी दा कोई सरोकार नेई।

काँपी राइट

लेखक कोल

*

प्रकाशन ब'रा

2018

*

मुल्ल

पाठकें ताई मुफ्त

*

पैहली बारी

500

*

प्रकाशक

अंजु प्रकाशन

जम्मू (जे. एण्ड के.)

फोन 0191-2650811

मो०-94197-89332

*

मुद्रक

क्लासिक प्रिंटर्ज

बाड़ी ब्राह्मणां, जम्मू - 181133

Mob.: 94191-49293

समर्पण

मां सीता राधा पार्वती,
काली मां लक्ष्मी सरस्वती।
जो मां ने रूप बनाए दे,
सारे जिस बिच समाए दे।
जो मां सभनें दा मालक ऐ,
स्त्रिष्टी दी जेहड़ी पालक ऐ।
दिंदी धन-दौलत बरकत ऐ,
कृति उसगी एह् समर्पत ऐ।

10000

किसी भी भीत में
किसी भी भीत में
हो जाय तो ह. म. म.
हो जाय तो ह. म. म.
हो जाय तो ह. म. म.
हो जाय तो ह. म. म.
हो जाय तो ह. म. म.
हो जाय तो ह. म. म.
हो जाय तो ह. म. म.

10000

10000

10000

10000

10000

10000

10000

10000

10000

10000

10000

अपनी गल्ल

प्रस्तुत कृति च लिखी गेदियां लगभग सबै कवितां आदि शक्ति जगदम्बा दे प्रति श्रद्धा रूपी फुल्लें दे समर्पण-भाव गी गै व्यक्त करदियां न। असला च इ 'यै' शक्ति साकार ते स्थूल ब्रह्माण्ड-पिण्ड दा रूप धारण करदी ऐ ते फही परमात्मा पुरुषोत्तम जीव रूप च होइयै समूलचे जगत् दे प्राणियें च प्रवेश करियै महा सरस्वती, महालक्ष्मी ते महाकाली दे रूपै च क्रमशा ब्रह्मा, विष्णु ते महेश गी शक्ति प्रदान करदे होई समें-समें उप्पर स्त्रिंशटी दी रचना, पालना ते खीर च संहार करियै स्त्रिंशटी दी लीला सम्पन्न करदी ऐ। इस आदि शक्ति दी मैहमा अपरम्पार ऐ। इस करी अध्ययन दी सुविधा आस्तै, मर्म आहले ते रहस्यात्मक ते दार्शनिक विशे गी स्पष्ट करने आस्तै, जां फही गैह्न तथ्य आहले विशे गी सौखा बनाने आस्ते केई किस्म दियें कथाएं द्वारा प्रस्तुत कीता गेदा ऐ। इस सूखम ते गम्भीर दर्शन आहले विशे गी श्रीमद्, भगवद् गीता दे चौहदमें ध्याऽ च बड़े सरल ढंगै नै अभिव्यक्त कीता गेदा ऐ। इस ध्याऽ दा चौथा श्लोक इस चाल्ली ऐ-

“सर्वयोनिषु कौन्तेय मूर्तयः सम्भवन्ति याः

तासां ब्रह्म मतद्योनिरहं बीज प्रदः पिता ॥”

अर्थात् एह द्रिंशटी गोचर स्थूल प्रकृति उस परम पिता परमेश्वर दी योनि ऐ जिस च ईश्वर जीवात्मा रूपी बीऽ पांदा ऐ। इस करी इस विचारानुसार ईश्वर गै सारे जगत् दा पिता ऐ ते प्रकृति गै जगत् जननी

मां ऐ। पर सूखमता कन्नै विचार करने उप्पर एह तथ्य होर स्पष्ट होई जंदा ऐ, जिस कन्नै जड़-चेतन, प्रकृति-पुरश, जगत् जननी ते जगत् पिता आह्ला विचार होर मता स्पष्ट होई जंदा ऐ। कीजे कु'न, कि'यां ते कुसी योनि मन्नियै जीव रूपी बीऽ पांदा ऐ, जिसलै उस अद्वैत आदि शक्ति दे अलावा होर कोई बी नेई ऐ, द्वैत भाव आहली गल्ल गै नेई लभदी उसलै जगत् माता ते जगत् पिता आहले द्वैतभाव दा सुआल गै पैदा नेई होई सकदा। कीजे कदें जेकर द्वैत भाव आहले विचार गी मन्नी लैता जा तां फही :-

“त्वमेव माता च पिता त्वमेव”

आहली उक्ति बी कदें सार्थक नेई होंदी। असला च इक्कै आदि शक्ति मां-प्यो दे रूपै च होइयै चराचर जगत् च विराजमान ऐ। इ'यै शक्ति वैश्णवी साकार रूपै च राधा, सीता, पार्वती आदि ऐ। इन्ना गै नेई बल्के “दुर्गा सप्तशती” दे “शतनाम” स्तोत्रानुसार इ'यै आदि शक्ति देव माता बी ऐ तां गै सती अनुसूइया दे रूप च इस आदि शक्ति वैश्णवी अगगै ब्रह्मा, विश्नु ते महेश बी बच्चे बनियै दुद्ध पीने गी रोंदे तड़फदे नजरी औंदे न। असला च इ'यै आदि शक्ति वैश्णवी गै ब्रह्म चारणी, चन्द्र घंटा, कूष्मांडा, स्कंध माता, कात्यायनी, कालरात्रि, महागौरी ते सिद्धि दात्री इ'नें न'वें रूपें गी समेटियै चलने करी नवदुर्गा दे रूप च आइयै ठारां भुजी वैष्णवी दे भव्य रूप-सरूप च विराजमान ऐ जेहदे प्रति मेरियां सब्भै श्रद्धायुक्त कवितां समर्पत न ; जेहदा रूप-सरूप अपने अन्दर करोड़ां चन्न-सूरज समेटियै उंदी लोऽ गी पोथी दे बाहरू सिरलेख आहले मुख सफे उप्पर खलारदे होई कृति दी खूबसूरती गी चार चन्न लाऽ करदा ऐ।

तस्तीब

सिरलेख	सफा नं.
1. इक मां दा स्हारा	9-11
2. मायावी राकश	12-14
3. प्यार दी हद	15-16
4. लफ्जें दी भिक्ख	17-18
5. सुक्खन	19-20
6. अहंकार दी कंध	21-22
7. खीरी कामना	23-25
8. मां कन्नै संवाद	26-28
9. पैह्ला रूप-शैल पुत्री	29
10. मन मंदर होऐ	30-33
11. मां दा निग्घ	34-36
12. मां दा दीदार	37-40
13. दूआ रूप-ब्रह्म चारिणी	41-42
14. दर्शनें दी भिक्खेआ	43-44
15. प्यार दी खमारी	45-47
16. मां स्हारा दे	48-50
17. त्रीआ रूप-चन्द्र घंटा	51-52
18. मां चरणें च वास	53-55

19. अनन्य शक्ति	56-58
20. चौथा रूप-कूष्मांडा	59-60
21. कर्णाधार मैया	61-63
22. मां दा संग	64-65
23. दया दी भिक्ख	66-67
24. पञ्चमां रूप-स्कंद माता	68-69
25. मां आदि शक्ति गंगा	70-71
26. दाती मां	72-74
27. समर्पण पत्तर	75-78
28. छेमां रूप-कात्यायणी	79-81
29. मां दी लीला	82-85
30. शक्ति रूपा	86-91
31. जग जननी	92-94
32. सतमां रूप-काल रात्रि	95-96
33. मां दी मैहमा	97-99
34. मां दा स्हान	100-102
35. निराकार शक्ति (मां)	103-104
36. अठमां रूप-महागौरी	105-106
37. मैया गी साद्दा	107-119
38. नांऽ दा नशा	120-123
39. नौमां रूप-सिद्धि दात्री	124-126

इक मां दा स्हार

अपने चरणें मिं लाई लैओ,
दुनिया शा मिं छडाई लैओ।

में सब किश करां न्यौछावर मां,
र'वां चरणें म्हेशां हाजर मां।
तुं'दे मां हिरखै चूर होआं,
दुनिया शा इन्ना दूर होआं।
लब्भै तुं'दे बिन कक्ख नेई,
बिन तुं'दे दिक्खै अक्ख नेई।
अपना मिं मां बनाई लैओ,
अपने चरणें मिं लाई लैओ॥

मोह् चाहन्नां मेरा पटोई जां,
दुनिया बी मेरी लटोई जा।
फही तुं'दी गोदा बेही जां,
में घोड़े बेची सेई जां।
मिगी भेद भाव सब भुल्ली जा,
त्रीऽ अक्ख बी मेरी खु'ल्ली जा।
मिं अपने कोल बुलाई लैओ,
अपने चरणें मिं लाई लैओ॥

दुनिया थमां मन दुआस होऐ,
 हिरदै मां तुं'दा वास होऐ।
 मन सिमरण तुं'दा चलदा जा,
 हिरखै दा बूहटा पलदा जा।
 दुख बदलन हवन समगरी च,
 सुख छाई जा हिरदे नगरी च।
 मिं अपना तुस बनाई लैओ,
 अपने चरणें मिं लाई लैओ॥

भगतें बिच भगत बनां आहल्ला,
 चलै जाप फड़े दे बिन माला।
 बनै सब किश भाव समर्पण मां,
 मेरी पूजा अर्चण-तर्पण मां।
 नेई जीआं फही जिस्मानी मां,
 बख्शो तुस प्राण रुहानी मां।
 मेरे औगुन तुस भुलाई लैओ,
 अपने चरणें मिं लाई लैओ॥

र'वां तुं'दे हुकमै बज्झो दा,
 बनी चरण-धूड़ में सज्जे दा।
 कदे मत्थै धूड़ मलोई जा,
 मिगी असली जीवन थोई जा।
 फही करियै अक्खीं बंद सदा,
 लुट्टां मां छवि दा नंद सदा,

अपने नै मिं मलाई लैओ,
अपने चरणें मिं लाई लैओ॥

अहंकार मेरा मां मुक्की जा,
मेरा अपना पन बी उक्की जा।
निं र'वै वासना अन्दर मां,
बनै हिरदा सुच्चा मंदर मां।
विकार बी औंदे झक्कन पही,
निं डरदे पैर बी रक्खन पही।
मन मेरा मां मनाई लैओ,
अपने चरणें मिं लाई लैओ॥



मायावी राकश

हिरदे दे भित्त गुहाड़ो मां,
मायावी राकश मारो मां।

दिन-रात जो मिगी डरांदे न,
रेही-रेही घेरा पांदे न।
चलदा निं बिंद बी जोर मेरा,
मन पौंदा ऐ कमजोर मेरा।
एह जदूं बी दिंदे न दस्तक,
मन अदूं गै होंदा नत्तमस्तक।
बिंद इ'नेंगी तुस पछाड़ो मां,
हिरदे दे भित्त गुहाड़ो मां॥

कदें सुखने बनियै चलदे न,
कदें सुखनें दे बिच ढलदे न।
कदें बनियै रंग सनैहरी एह,
आई जंदे दिनै-दपैहरी एह।
कदें सज्जन जन एह लभदे न,
परपंच रचाइयै ठगदे न।
तुस मेरे गला तुआरो मां,
मायावी राकश मारो मां॥

इ'नें म्हेशां जाल बछाया ऐ,
 हर बारी इ'नें मिं ढाया ऐ।
 अन्दरा गै पैदा होंदे न,
 अन्दर गै छप्पी रौंहदे न।
 एह भेस बटाइयै औंदे न,
 हर बारी दाऽ मिं लांदे न।
 इक बारी इ'नेंगी मारो मां,
 हिरदे दे भित्त गुहाड़ो मां॥

सौखा निं इ'नेंगी नसाना मां,
 इंदा कब्जा बड़ा पुराना मां।
 तुस अन्दर डेरा लाओ मां,
 कोट्टा फही विशें दा ढाओ मां।
 बे घर जदूं इ'नें होना ऐ,
 मिं दूआ जीवन थहोना ऐ।
 तुस विशें दी धूड़ डुआरो मां,
 हिरदे दे भित्त गुहाड़ो मां॥

जदूं झण्डा चढ़दा इंदा मां,
 अदूं होन्नां में शर्मिदा मां।
 इ'नें अत्त दम्हूल मचाए दा,
 हर कुसै गी लम्मै पाए दा।
 जे हिरदै तुं'दा वास होऐ,
 फही की निं इंदा नास होऐ।

मिं तारो इ'नेंगी मारो मां,
हिरदे दे भित्त गुहाड़ो मां॥

मिगी दस्सो योद्धा केहड़ा ऐ,
बचेआ इंदे शा जेहड़ा ऐ।
जो बी दुनियावी बंदा ऐ,
इ'नें लाया उसगी कंधा ऐ।
सुनदे निं तरले छन्दे एह,
मिं लहु-लुहान करी जंदे एह।
तुस तौनी इ'नेंगी चाढ़ो मां,
हिरदे दे भित्त गुहाड़ो मां॥



प्यार दी हद

केह् दस्सां तेरे कन्नै किन्ना प्यार दाती मां,
किन्ना ऐ उच्चा दिलै बिच थाहर दाती मां।
मसाल देआं कोह्दे नै करां मकाबला,
दुनिया च नेहा लब्भा निं दिलदार दाती मां।

खुशी ब्यान करां कि'यां भाशा गी सजां,
करां में कु'नें लफ्जें नै शंगार दाती मां।
दिंदा ऐ खुशी जिन्ना तुं'दा प्यार दाती मां,
नेई देई सकदी ब्हारें बिचा ब्हार दाती मां।

मनै दा भाव पूरी चाल्ली दसदा खोहल्लियै,
जे होंदा खु'ल्ला लफ्जें दा पटार दाती मां।
मनै च भाव मते समां घट्ट लफ्ज घट्ट,
मतां निं पाई सकदा में खलार दाती मां।

मेरी सच्ची-सुच्ची दिलै दी तूं समझ भावना,
मसूसी लै दिलै नै नेई नकार दाती मां।
भाएं दिल बी रक्खां चीरियै निं सच्च निकलना,
छड़ी निकलनी ऐ लहुआ दी गै धार दाती मां।

जे होंदा हनुमान दसदा छाती फाड़ियै,
 नेई रौंहदा पिच्छै बिंद बी दुहार दाती मां।
 किन्ने न तेरे स्थान करां केह-केह ब्यान,
 किन्ना ऐ मेरे सिर तुं'दा भार दाती मां।



लफजें दी भिवख

लिखने दा मां मिं ब्हाना थ्होई जा,
लफजें दा मां मिं खजाना थ्होई जा।

लिखां तेरे गीत मां में चुनी-चुनियै,
लफजें दे केई रंगें बुनी-बुनियै।
लफज बी आम मेरे खास बनी जाहन,
चलन मताबक मेरे दास बनी जाहन।
लफजें दा लाबा नित्त नमां में पुआंऽ,
घट्ट-बद्ध होऐ निं जेहड़ा में बनांऽ।
मिं तेरे कोल मां ठकाना थ्होई जा,
लिखने दा मां मिं ब्हाना थ्होई जा॥

ध्वनियां टवर्गी होन कुंडल ते बालियां,
बनी जाहन मत्थे पर लटां इ'यै कालियां।
इ'यै कदें बनी जाहन बाहमें दियां चूड़ियां,
हिरखै दे लफजें इ'यै होइयै लाल गूढ़ियां।
नत्थ बनी इ'यै करन नक्कै दा शंगार,
कदें बनै बिंदी फही होइयै अनुस्वार।
मैहमा करने गी फसाना थ्होई जा,
लिखने दा मां मिं ब्हाना थ्होई जा॥

मां म्हेशां र'वां में तुं'दे अंग-संग,
 भुल्ली जाहन मिगी दुनिया दे रंग-ढंग।
 इक बारी चढ़ी जा जे मां तुं'दा रंग,
 कुसै हाल बिच बी निं होआ में तंग।
 दुनिया दी नजरी में र'वां भां मलंग,
 खुशी बिच नच्चै मेरा सदा अंग-अंग।
 फही कि'यां कोई बी बगाना होई जा,
 लिखने दा मां मिं ब्हाना थ्होई जा॥

लब्भा निं हितेशी मिं न कोई मित्तर,
 चाहन्ना में तुआरां तुं'दा रेखा चित्तर।
 मेरे लफ्जें च इन्नी शक्ति आई जा,
 साक्षात मां ओह्दे च समाई जा।
 झटपट भाव जेहड़ा चांह लखोई जा,
 भावें दे मताबक हर लफ्ज होई जा।
 सुर-लैऽ बज्झा मिं फसाना थ्होई जा,
 लिखने दा मां मिं ब्हाना थ्होई जा॥



सुक्खन

शीर्वाद एहकड़ा मां तुं'दा थोई जा,
हिरखै दा सारें पर जादू होई जा।

हिरखै च रौहन सारे गि'डी-मि'डियै,
सूहे, पीले, नीले फुल्ल खिड़ी-खिड़ियै।
सारें बिच हिरख समोध आई जा,
हिरखै च जीने आह्ला बोध आई जा।
नफरत आह्ला सूरज कदें घोई जा,
शीर्वाद एहकड़ा मां तुं'दा थोई जा॥

प्यार आहली त्रुट्टी दी गंठोई जा तंद,
हिरखै दी कोरजै दा फुटी पवै छम्ब।
दिलें बिचा नफरतै दा निकली जा गंद,
चार दिन जीने दा फही बज्झी जा नंद।
एहकड़ी मां मन्नत मेरी मनोई जा,
शीर्वाद एहकड़ा मां तुं'दा थोई जा॥

दिलें दे दरेआ पौन हिरखै दे छल्ल,
द्वेश-भाव आहली सारे भुल्ली जाहन गल्ल।
प्यार-भाव सारें च मुड़ी समाई जा,
चेहरे पर हिरखै दा रंग छाई जा।

बक्खरा फही सभनें दा गुहाड़ होई जा,
शीर्वाद एहकड़ा मां तुं'दा थ्होई जा॥

कुसै गी निं कुसै 'र र'वै कोई मलाल,
हिरखै च होई जाहन सारे मालामाल।
सुखना एह मेरा मां होई जा परतक्ख,
तुं'दे अगै अर्जी निं होर मेरी कक्ख।
खुश-खुश सारें दी नुहार होई जा,
शीर्वाद एहकड़ा मां तुं'दा थ्होई जा॥

बैर-भाव आहला रस्ता सारे भुल्ली जाहन,
हिरखै दे भित्त सारें दे खु'ल्ली जाहन।
दिलै च थाहर हिरखै दा बनी जा अन्दर,
हिरखै दी जोत जगै दिल बनै मन्दर॥
तुं'दे हिरखै दा सब गी छुआड़ थ्होई जा,
शीर्वाद एहकड़ा मां तुं'दा थ्होई जा।

हिरखै दे नशे बिच होन सारे दुत्त,
मतभेद भुल्ली सारे होन इक जुट्ट।
दिलें बिच हिरखै दा आई जा तूफान,
माहनू कनै माहनू दी होऐ पन्छान।
जैकारा जगदम्बे दा मूहां बलोई जा,
शीर्वाद एहकड़ा मां तुं'दा थ्होई जा॥



अहंकार दी कंध

अहंकार कदें जे भज्जी जा,
मां तिल ओहल्लै मिगी लब्धी जा।

मन भाव समर्पण आई जा,
साहें बिच मां समाई जा।
मन मां दी छवि तुआरी लै,
मन मंदर झांकी मारी लै।
भोगें शा मन मेरा रज्जी जा,
अहंकार कदें जे भज्जी जा॥

मन मां दी छवि जे बस्सी जा,
फही औगण हर इक नस्सी जा।
मन इक्कै रंग रंगोई जा,
मिगी संग मां दा थ्होई जा।
फही कि'यां कोई मिं ठगगी जा,
अहंकार कदें जे भज्जी जा॥

मन मेरा मालामाल होऐ,
मां दा नेहा कमाल होऐ।
मन मां दी मूरत थापी लै,
थाह् श्रद्धा आहली नापी लै।

इ'यै नेही लगन मिं लग्गी जा,
अहंकार कदे जे भज्जी जा।

मन इक्कै सोच सुआर र'वै,
हिरदे बिच मां दा थाहर होऐ।
जो अन्दर उ'ऐ बाहर होऐ,
मिगी लभदी सदा नुहार र'वै।
इ'यै नेही लगन फही लग्गी जा,
अहंकार कदे जे भज्जी जा॥



खीरी कामना

जदूं साह जिंदू च खीर होऐ,
अक्खियें मां दी तस्बीर होऐ।

निं होऐ कोई बी मन संशा,
निं र'वै बकाया कोई मंशा।
खुशी बिच मन विदा होई जा,
मां चरणें 'र फिदा होई जा।
दुनिया चा खुशी नै नस्सी जा,
जाई परमधाम ओह बस्सी जा।
निं अक्खीं बिंद बी नीर होऐ,
जदूं साह जिंदू च खीर होऐ॥

मां कोल जदूं पही औंदी जा,
मन बक्खरी खुशी समांदी जा।
यमदूत निं अदूं डरान मिगी,
निं दैहशत मनै च पाहन मिगी।
झट मोह दी रस्सी त्रुट्टी जा,
मन इस दुनिया थमां रुस्सी जा।
निं बिंद बी दुखी शरीर होऐ,
जदूं साह जिंदू च खीर होऐ॥

साहें बिच मां दा वास होऐ,
 मन बिंद बी निं दुआस होऐ।
 मिगी देह बी अपना भुल्ली जा,
 रंग मोह-माया दा उ'ल्ली जा।
 साह सौखा मेरा निकली जा,
 झड़के नै दीआ हिस्सली जा।
 निं जिंदू कुतै बी पीड़ होऐ,
 जदूं साह जिंदू च खीर होऐ॥

निं मनै च बिंद बी दुक्ख होऐ,
 जीने दी होर निं भुक्ख र'वै।
 मन ओहदी रजा च रज्जी जा,
 दुनिया दे भोग सब तज्जी जा।
 मन इक्कै बस फतूर होऐ,
 निं मां अक्खियें शा दूर होऐ।
 हत्थै च धनश ते तीर होऐ,
 जंदू साह जिंदू च खीर होऐ॥

मन मेरा जाने गी मन्नी जा,
 एह कंध दुनिया दी भन्नी जा।
 मिं अपनी पूरी होश होऐ,
 निं मनै च बिंद बसोस होऐ।
 मन मेरा होऐ दलेर अदूं,
 होऐ बाहन मां दा शेर जदूं।

ते अगगै लंगर वीर होऐ,
जदूं साह जिंदू बिच खीर होऐ॥

डर-भै मेरा सब नस्सी जा,
मां रोम-रोम बिच बस्सी जा।
कोई दुख-बमारी फड़कै निं,
साह बिंद बी मेरा अड़कै निं।
पिंजरा गरसाल झट भज्जी जा,
फही नमां-नकोर मीं लब्धी जा।
इ'यै नेही तकदीर होऐ,
जदूं साह जिंदू बिच खीर होऐ॥

में पलै च इत्थुआं दौड़ी जां,
एह् दुनियादारी छोड़ी जां।
अन्दरा दुआसी नस्सी जा,
मनै सुर्गे दा सुख बस्सी जा।
मिगी अपने उप्पर लब्धन फही,
बिछड़े दे सारे सज्जन फही।
जित्थै म्हेशां लग्गी भीड़ र'वै,
जदूं साह जिंदू बिच खीर होऐ॥



मां कल्लै संवाद

मैया कन्नै गल्ल-बात होऐ,
खुशियें दी फही परभात होऐ।

सत्त रंगें मन रंगोंदा जा,
मैया नै तन्मय होंदा जा।
मन खुशियें बिच भरोई जा,
अनमुल्ला मोती थ्होई जा।
र'वै खुश-खुश मेरी तबीयत,
होऐ उच्ची मेरी शख्सीयत।
हर चानन मेरी रात होऐ,
मैया कन्नै गल्ल-बात होऐ॥

नेई मिं कुसै दी लोड़ र'वै,
हर पूरी मेरी थोड़ होऐ।
दुख-कश्ट मेरा हर मुक्की जा,
हीखी बी हर इक चुक्की जा।
नेई थां-थां नस्सां-भज्जां में,
मैया दे चरणें सज्जां में।
दीदार दी मिं सगात थ्होऐ,
मैया कन्नै गल्ल बात होऐ॥

में खुशी दा पर्व मनाई लैं,
 खुशियें बिच नच्ची गाई लैं।
 मेरा मन मनै बिच मस्त र'वै,
 दुख मेरा हर इक अस्त होऐ।
 इक तार जुड़ी बेतार होऐ,
 गल्ल चलदी फही लगातार र'वै।
 फही खुशियें दी बरसात होऐ,
 मैया कन्नै गल्ल बात होऐ॥

हिरदे बिच इन्ना प्यार होऐ,
 निं खाल्ली बिंद बी थाहर र'वै।
 मन खुशी च इन्ना फुलदा जा,
 बाहर अक्खीं राहें डु'लदा जा।
 दुख सारे मेरे होन सुआह,
 हिरदे दा चेहरा बनै गुआह।
 कदें नेही करामाता होऐ,
 मैया कन्नै गल्ल बात होऐ॥

इक पलै च बीती जाहन साल,
 लंघी जाहन केई सोहे-स्याल।
 रुत्तें दा निं एहसास र'वै,
 गर्मी-सर्दी दा नास होऐ।
 दिन होऐ ना रात होऐ,
 इक्कै पल-खिन तैनात र'वै।
 मैया कन्नै-गल्ल-बात होऐ॥

कदें गल्ल होई जा इक बारी,
फही बारी जां में सौ बारी।
हिरदे दी खु'ल्ली जा बारी,
फही होआं कदें निं संसारी।
गल्ल-बात कदें फही त्रुट्टै नेई,
मन मेरा थक्कै-हुट्टै नेई।
बिन मां निं इक सुआस होऐ,
मैया कनै गल्ल-बात होऐ॥



पैह्ला रूप—शैल पुत्री

सती रूप मां तुं'दा जेहड़ा,
शैल पुत्री च करै बसेरा।

सज्जै हत्थ सोभै त्रिशूल,
खब्बै कमल-फुल्ल स्त्रिष्टी मूल।
त्रिशूल करै दुष्टें दा नास,
कमल करै स्त्रिष्टी दा विकास।
धर्म दा करदी मां प्रसार,
होंदी जदूं बी बैल सुआर।
पाप दा जा चकोई डेरा,
सती रूप मां तुं'दा जेहड़ा॥

कीता गर्व देवें दा चूर,
हैमवती नांऽ होआ मशहूर।
पैह्ला रूप मां तुं'दा होंदा,
बिच नरातें जेहड़ा पजोंदा
इस दिन योगी अपना ध्यान,
मूलाधार चक्र बिच लाहन।
हिरदे बिचा मिटै फही न्हेरा,
सती रूप मां तुं'दा जेहड़ा॥



मन मंदर होऐ

देओ हां वर मिं महामाई,
सभनें दे दिलें च जां छाई।

निं मन अहंकार र'वै कैंतर,
फूको मां नेहा तुस मैंतर।
रोह भलेआं मेरा उड़डी जा,
मन शान्त लोक बिच पुज्जी जा।
करै वास मेरै निं वासना,
थ्होऐ मां चरणें दा ढासना।
निं जित्थुआं विशे सकन ल्हाई,
देओ हां वर मिं महामाई॥

परसुआर्थ नदी च न्हाई लैं,
ते रूप विराट बनाई लैं।
निं र'वै द्वेष बिंद बी अंदर,
मन बनी जा मां दा पही मंदर।
मन भेदभाव सब तज्जी जा,
कंध बंडने आहली भज्जी जा।
सभनें दे हिरदै पुज्जां जाई,
देओ हां वर मिं महामाई॥

मिं लोभ सुआर्थ घेरै नेई,
 आवै छल-छिद्र नेडै नेई।
 मन निर्मल हौला होई जा,
 मिं असली जीवन थोई जा।
 पंज भूत डरान निं मिं माता,
 र'वै म्हेशां तुंदे नै नाता।
 लैओ इक बारी मिं अपनाई,
 देओ हां वर मिं महामाई॥

माया दी मैल सब उ'ल्ली जा,
 मेरी अंतर द्रिस्टी खु'ल्ली जा।
 नफरत दी गागर डु'ल्ली जा,
 मिं अपना-पराया भुल्ली जा।
 तुं'दी जगमग सभनें च लब्धै,
 नेई तुं'दे बिन किश सज्जै-खब्बै।
 सभनें गी सनांऽ गाई-गाई,
 देओ हां वर मिं महामाई॥

में बुरा कुसै दा निं सोचां,
 दिल कौड़े बोल्लें निं नोच्चां।
 मन परमार्थ बिच मस्त होऐ,
 म्हेशां सेवा बिच व्यस्त र'वै।
 दया-भावें दिल भरोंदा जा,
 बूहटा सदगुणी मठोंदा जा।

मिं ओड़ो अमरत पलेआई,
देओ हां वर मिं महामाई॥

फही सुच्चा मन संसार होऐ,
अवगुणें दा नेई खलार होऐ।
करुणा दी कोरज कुरजै मन,
मन होई जा मेरा धन-धन।
ते सदा संवेदन शील होऐ,
हित करने च क्रिया शील र'वै।
एह करो हां किरपा तुस माई,
देओ हां वर मिं महामाई॥

हिरदे बिच निरा प्यार होऐ,
दुश्मन ना कोई यार होऐ।
निं कुसै नै मेरी खार होऐ,
सब नै इक नेहा व्यहार होऐ।
दुनिया मेरा परोआर होऐ,
जीने दा असली सार थहोऐ।
निं करां कुसै दी में बुराई,
देओ हां वर मिं महामाई॥

मन सब दा होऐ मित्तर एह,
गंगा-जल साहीं पवित्तर एह।
मना विशे-वासना बिस्सरी जा,
अवगुणें दा रेटा नित्थरी जा।

गंगा सदगुणें दी दौड़ै फही,
 पापें गी झटपट रोहड़ै फही।
 मन मंदर छोड़ो चमकाई,
 देओ हां वर मिं महामाई॥



मां दा निग्घ

लफ्जें जो नेई बन्होई सकै,
खुशी मां दे निग्घै थ्होई सकै।

मन जेहदा मां बिच रुझदा ऐ,
ओह् खुशी निग्घ दी बुझदा ऐ।
असली एहसास बिच जींदा ऐ,
अमरत दा प्याला पींदा ऐ।
ओह् नंद जिसी बी थ्होंदा ऐ,
ब्यान निं उस शा होंदा ऐ।
पही उस शा केह् बलोई सकै,
लफ्जें जो नेई बन्होई सकै॥

जिस सागर डुबकी लाई निं,
जोती नै जोत जलाई निं।
मन हिरखी पीड़ जगाई निं,
कि 'यां आक्खै मिलदी माई निं।
मन रक्खेआ जिस नै सोती ऐ,
मिलेआ मां रूपी मोती ऐ।
मिलदा उसी जेहड़ा रोई सकै,
लफ्जें जो नेई बन्होई सकै॥

जिन्न सब किश मां पर सुट्टेआ ऐ,
 नंद उस्सै असली लुट्टेआ ऐ।
 सुख उसने सुर्गी पाया ऐ,
 जीवन बी सफल बनाया ऐ।
 धन्न-धन्न ओह् होई गेआ,
 जिसी खजाना थहोई गेआ।
 निं खत्म कदें जो होई सकै,
 लफ्जें जो नेई बन्होई सकै॥

मां जेह्दे कन्नै होई जा,
 झट बेड़ी बन्नै होई जा,
 चप्पू निं भाएं मलाह् होऐ,
 भव सागर अदू तलाऽ होऐ।
 जिस मां गी कन्नै रक्खेआ ऐ,
 बनदी मां कवच सुरक्खेआ ऐ।
 जेह्ड़ा निं कदें कटोई सकै,
 लफ्जें जो नेई बन्होई सकै॥

सुख बक्खरा जन कमाल मिलै,
 जिसदी निं कोई मसाल मिलै।
 मिलै झलक रंग निं कुसै कन्नै,
 जिसी छड्डने गी निं मन मनै।
 सत्त रंगा सुख सुहाना ओह्,
 झूटा सुर्गी मन भाना ओह्।

निं होर कुतै जो थ्होई सकै,
लफजें जो नेई बन्होई सकै॥

सुख मां शा जेहड़ा थ्होंदा ऐ,
केह् दस्सां मसूस मिं होंदा ऐ।
पेई जंदी ठंड फही फोकी ऐ,
धुप्प चढ़दी कोसी-कोसी ऐ।
करै गर्मी-सर्दी जोर नेई,
बिन खुशी मनै किश होर नेई।
मां बिन निं एह सब होई सकै,
लफजें जो नेई बन्होई सकै॥



मां दा दीदार

मां शान्त रूप बिच आई जाओ,
तुस दर्शन मिगी कराई जाओ।

मेरी तृष्णा सारी मुक्की जा,
मेरी भुक्ख-त्रेह बी चुक्की जा।
तुस सामधाम मां आई जाओ,
मेरे जीवन बिच समाई जाओ।
मन खुशी दे बिच भरोई जा,
जो चांहदा मन ओह थ्होई जा।
इक बारी फेरा पाई जाओ,
मां शान्त रूप बिच आई जाओ॥

मन खुशी च नेहा लीन होऐ,
नेई कुसै बी चाल्ली दीन र'वै।
मन मेरा मां धन्न-धन्न होऐ,
दिनै-रातीं चढे दा चन्न र'वै।
जे दौलत एहकड़ी थ्होई जा,
हर कारज सफल पही होई जा।
मां अपना मिगी बनाई जाओ,
मां शान्त रूप बिच आई जाओ॥

मेरी इच्छा पूरी होई जा,
 बिछड़ी दी मां मिं थोई जा।
 मन नच्चग अदूं एह मेरा फही,
 जदूं हिरदै लगग डेरा फही।
 में मां दा वास बनाई लैना,
 उसी हिरदे बिच बठाई लैना।
 मिगी अपना दास बनाई जाओ,
 मां शान्त रूप विच आई जाओ॥

अवगुणें दा घाऽ में पुट्टियै,
 हिरखै दा हैल फही सु'ट्टियै।
 सिमरन दी गोड्डी लानी ऐ,
 नैनें दा देना पानी ऐ।
 मन-बूहटा कुतै मठोई जा,
 फल मां रूपै बिच थोई जा।
 इस काबल मिं बनाई जाओ,
 मां शान्त रूप बिच आई जाओ॥

जदूं हिरदै मां ने बस्सना ऐ,
 नेई थाहर-थाहर में नस्सना ऐ।
 नेई खुशी च मन खड़ोना ऐ,
 में बौहना नेई बसोना ऐ।
 अदूं माहनू जीवन होना ऐ,
 जो चाहना में ओह थोना ऐ।

इ'यै नेही खुशी बनाई जाओ,
मां शान्त रूप बिच आई जाओ ।।

नेई फुल्लेआ मन समाना ऐ,
अदूं ब्हारें हस्सना-गाना ऐ ।
नेई गर्मी-सर्दी रौहनी फही,
छड़ी ब्हार बसैंती होनी फही ।
दिन-रात फही कुन्न पछाननी ऐ,
जदूं म्हेशां रौहनी चाननी ऐ ।
पल ओहकड़ा आई बनाई जाओ,
मां शान्त रूप बिच आई जाओ ।।

अदूं सूरज-चन्न घरोना ऐ,
जदूं मां ने आई खड़ोना ऐ ।
रातीं बी होना सवेरा ऐ,
जदूं पाना मां ने फेरा ऐ ।
रौहनी निं कोई दुआसी फही,
सदा होनी पूर्णमासी फही ।
मां इक बारी तुस आई जाओ,
मां शान्त रूप बिच आई जाओ ।।

में खुशी दे बिच बतोना ऐ,
नेई मूहां किश बलोना ऐ ।
दिन-रात बराबर होनी ऐ,
हर बेल्लै जगमग रौहनी ऐ ।

धुंधले पेई जाने चन्न-तारे,
जदूं मुकट दे पौने लश्कारे।
इक बारी नूर बर्हाई जाओ,
मां शान्त रूप बिच आई जाओ॥



दूआ रूप—ब्रह्म चारिणी

हिरदे दे बिच रूप बसाओ,
जीवन अपना सफल बनाओ।

ब्रह्म चारिणी रूप ऐ दूआ,
जोती साहीं बझोंदा सूहा।
चमकीला जो बड़ा गै सोहना,
लगदा भगतें गी मन-मोहना।
सज्जे हत्थ फळ्बै जप-माला,
खळ्बै कमंडलु पूजा आह्ला।
उस्सै रूप च मन-चित्त लाओ,
हिरदे दे बिच रूप बसाओ॥

नारद दा सुनियै उपदेश,
मनै गी जिन्नै कीता निर्देश।
वरणें गी शंकर भगवान,
औखे तप च लाया ध्यान।
ज्हार साल छड़े फल गै चक्खे,
घा-सागै पर सौ ब'रे कट्टे।
उस देवी दे गुण तुस गाओ,
हिरदे दे बिच रूप बसाओ॥

रक्खे बर्त किश दिन गुजारे,
धुप्प-बर्खा दे कश्ट बी सहारे।

खुल्ले अम्बरा हेठ तप कीता,
 कश्टें गी करी अमरत पीता।
 इन्ना किश जदूं पेआ जरना,
 तां तदूं पेआ नांऽ अपर्णा।
 उस देवी गी अज्ज मनाओ,
 हिरदे दे बिच रूप बसाओ॥

ज्हारां ब'रे तप करी कठोर,
 देह देवी दी होई कमजोर।
 त्र'ऊं लोकें पुज्जा फरमान,
 ऋषि-मुनि देव बी लगे सराहन।
 रूप एह दूआ अति फलदायक,
 भगतें-सिद्धें दे सब लायक।
 सभनें गी एह कथ सनाओ,
 हिरदे दे बिच रूप बसाओ॥

इस रूप दी करो उपासना,
 जा हिरदे चा मिटी वासना।
 तप-त्याग दी करै एह बृद्धि,
 थोए हर थां उसगी सिद्धि।
 जदूं इस रूप गी साधक बुज्झै,
 स्वाधिष्ठान चक्र बिच पुज्जै।
 कदें निं दूआ रूप भुलाओ,
 हिरदे दे बिच रूप बसाओ॥



दर्शनें दी भिक्खेआ

मिगी अपना दास बनाओ मां,
दुनिया बिच खास बनाओ मां।

सिर चरणें तोड़ी जान देओ,
छड़ा इन्ना तुस वरदान देओ।
अन्दरै दी में-में नस्सी जा,
इक याद मां तुं'दी बस्सी जा।
मिं भलेआं तुस मां झुकन देओ,
किश चिर अपने कश रुकन देओ।
तुस नेहा रंग चढ़ाओ मां,
मिगी अपना दास बनाओ मां॥

मेरा हिरदे होऐ सुच्चा मां,
होऐ सिर दुनिया बिच उच्चा मां।
बनां तुं'दा भगत नराला में,
दुनिया नै र'वा पराह्ला में।
तुं'दी शक्ति दा पात होऐ,
संग तुं'दा मां दिन-रात र'वै।
अपने नै मिगी मलाओ मां,
मिगी अपना दास बनाओ मां॥

मां साहें तुं'दा वास होऐ,
तुं'दा गै सदा एहसास र'वै।

फही कदेँ निं में दुआस होआं,
 मां तुं'दा जेकर दास होआं।
 जे म्हेशां तुं'दा साथ होऐ,
 कम्म की निं अपने आप होऐ।
 माया शा मिगी छड़ाओ मां,
 मिगी अपना दास बनाओ मां॥

जदूं मां ने कन्नै होना ऐ,
 मन नेई अदूं थम्होना ऐ।
 खुशी रौहनी फही म्यान नेई,
 होनी बी कदेँ ब्यान नेई।
 बिन हस्से अक्खियें हस्सना ऐ,
 चेहरे ने सब किश दस्सना ऐ।
 हिरदे बिच फेरा पाओ मां,
 मिगी अपना दास बनाओ मां॥

पौंहच होनी जदूं मां धुक्कर,
 दुनिया बिच होना में उप्पर।
 फही भुंजा पैर निं पौना ऐ,
 जदूं हीरा ओह मिं थ्होना ऐ।
 मनोमन में गुनगुनाना फही,
 में कुतै निं औना-जाना फही।
 तुंस दर्शन पान कराओ मां,
 मिगी अपना दास बनाओ मां॥



प्यार दी खमारी

में चाहन्नां मां दा प्यार थोऐ,
चरणें बिच मेरा थाहर होऐ।

करी भक्ति मन फही रज्जै नेई,
बिंद होऐ सज्जै-खब्बै नेई।
मां भक्ति दे बिच नंद थोऐ,
बनी भक्ति जीवन अंग र'वै।
मे' हिरदै याद बसाई लै',
रुस्सी दी मां मनाई लै'।
भाएं रुस्से दा संसार र'वै,
में चाहन्ना मां दा प्यार थोऐ॥

में मनै च लाई ध्यान सदा,
करां भक्ति-रस दा पान सदा।
नेही चढ़ै खमारी भक्ति दी,
निं र'वै फही हीखी मुक्ति दी।
रंग भक्ति दा फही उ'ल्लै नेई,
मन दुनिया दे बिच भुल्लै नेई।
बेड़ी भव-सागर पार होऐ।
में चाहन्नां मां दा प्यार थोऐ॥

मां ऐसी किरपा करदी जा,
 मेरी निश्ठा दिन-दिन बधदी जा।
 नांऽ तेरा जपां निरंतर मां,
 दिन-रात दा मुक्कै अंतर मां।
 शक्ति दा पात जे होई जा,
 मिं परमानंद फही थोई जा।
 नांऽ जीभा सदा सुआर र'वै,
 में चाहन्नां मां दा प्यार थोऐ॥

मन सदा नशे बिच दुत्त र'वै,
 इक्कै नेही जित्थै रुत्त होऐ।
 ना गरमी-सरदी तंग करै,
 ना जीवन कोई मंग करै।
 हर लिस्सी मनै दी आस पवै,
 मन-इन्द्र अदूं दुआस होऐ।
 फही जीवन आर जां पार होऐ,
 में चाहन्नां मां दा प्यार थोऐ॥

इस लोक च र'वां में सुत्ते दा,
 ते मां दे लोक च उट्ठे दा।
 बेहोशी मनै च चलदी जा,
 रूह मां दे सुखनें ढलदी जा।
 मां अमरत बर्खा करदी जा,
 मेरा अंतर मन भरदी जा।

निं हीखी कोई होर होऐ,
में चाहन्नां मां दा प्यार थ्होऐ॥

अद्ध चेतन सारा कम्म चलै,
चेतन बिच मां दा प्यार पलै।
जित्थै टपटप अमरत चौंदा जा,
मेरे हिरदे बिच पौंदा जा।
में असली जीवन जींदा जां,
सुत्ते दा अमरत पींदा जां।
दुनियावी होश फरार होऐ,
में चाहन्ना मां दा प्यार थ्होऐ॥

मन पीऽ-पीऽ थक्कै-हुट्टै निं,
बिंद अक्ख बी अपनी पुट्टै निं।
केह् करना होश च आइयै में,
ते असली होश गुआइयै में।
में चाहन्ना र'वां बेहोशी च,
लक्खलानत आई जां होशी च।
जीवन निरा जित्थै भार होऐ,
में चाहन्ना मां दा प्यार थ्होऐ॥



मां स्हारा दे

भगतें गी निं मां ढौन देआं,
निं किस्मत कुसै दी सौन देआं।

तूं गृह मैंतरी सारें दी,
देवें दे बी परिवारें दी।
तूं सब दी झोली भरनी ऐं,
भगतें दे दुखड़े हरनी ऐं।
फही बच्चा कुसै दा बिछड़ै की,
मां दे हिरदे शा निक्खड़ै की।
निं दुखी कुसै गी होन देआं,
भगतें गी-निं मां ढौन देआं॥

बेमौका साह की मुक्की जा,
विश्वास कुसै दा त्रुट्टी जा।
तूं आपूं मां विधि माता ऐं,
सभनें दी भाग्य विधाता ऐं।
थां-थां सिफारश करी सकनीं,
साह जेहदे मुक्कन भरी सकनी।
निं मां तूं कुसै गी रोन देआं,
भगतें गी निं मां ढौन देआं॥

ना मुमकन मुमकन करी सकनीं,
 जो चाहें मां तूं करी सकनीं।
 निं झोली खाल्ली होन देआं,
 निं लाल कुसै दा सौन देआं।
 पिछले कुकर्म मटाई सु'ट्ट,
 बिगड़ी दी गल्ल बनाई सु'ट्ट।
 निं विचलत कुसै गी होन देआं,
 भगतें गी निं मां ढौन देआं॥

विश्वास कुसै दा उठदा ऐ,
 पर हिरदे मेरे त्रुटदा ऐ।
 लग्गै कोई ताहन्ने मारा दा,
 छाती बिच खंजर ताहड़ा दा।
 पिछला तूं स्हाब मटाई दे,
 मुड़-मुंढा कम्म चलाई दे।
 कदें अपसगनी निं होन देआं,
 भगतें गी निं मां ढौना देआं॥

जो तेरे कन्नै रुसदा ऐ,
 बिन सोचे उंगल चुकदा ऐ।
 दुख अदूं मिं जिन्ना होंदा ऐ,
 लफ्जें बिच नेई बन्होंदा ऐ।
 मन अदूं केह दस्सां करदा ऐ,
 दुख किस चाल्ली ओह जरदा ऐ।

निं कुसै दी अक्ख भरोन देआं,
भगतें गी निं मां ढौन देआं॥

जो पिछली करनी होंदी ऐ,
निं याद कुसै गी रौंहदी ऐ।
निं रक्खेआं पिछला याद माए,
निं करेआं स्हाब-कताब माए।
तूं दया दी सागर अम्बा ऐं,
मां जग जननी जगदम्बा ऐं।
निं आंदर कोई खचोन देआं,
भगतें गी निं मां ढौन देआं॥



त्रीआ रूप-चन्द्र घंटा

त्रीए रूप दा करै जो ध्यान,
झट उसदा होई जा कल्याण।

मत्थै अद्धा चन्न ऐ इ'यां,
घैंटी दा आकार ऐ जि'यां।
भगतें पर किरपा एह बरहांदी,
चन्द्र घैंटा तां गै खुआंदी।
रंग सनैहरी ते चमकीला,
घैंटी दा रंग पीला-पीला।
हर मुशिकल जो करै आसान,
त्रीए रूप दा करै जो ध्यान॥

सोभन मां गी सूहे वस्त्र,
दसमें हत्थ च अस्त्र-शस्त्र।
आन-वान ते बक्खरी शान,
शेर ऐ जिस देवी दा बाहन।
लब्धै युद्ध च सदा तयार,
शेरा पर मां होई सुआर।
मां गी दिक्खियै दैत्य तराहन,
त्रीए रूप दा करै जो ध्यान॥

जदूं नरातें एह दिन बौहड़े,
साधक मणिपूरक मन जोड़ै।

चन्द्र घेंटा जदूं मन बस्सै,
 दि'ब्ब पदार्थ केई पही दस्सै।
 दि'ब्ब खशबोइयां खुशी बरहान,
 ध्वनियां दि'ब्ब चबक्खी छाह्न।
 साधक खुशी च नच्चन गान,
 त्रीए रूप दा करै जो ध्यान॥

दि'ब्ब भाव वाणी च आई जा,
 चेहरै लोऽ बी दि'ब्ब समाई जा।
 होंदे लब्भन पाप पही नश्ट,
 मुकदे जाह्न पही सारे कश्ट।
 रग-रग बिच भरोऐ मिठास,
 र'वै बकाया निं कोई आस।
 करी सकै नेई खुशी ब्यान,
 त्रीए रूप दा करै जो ध्यान॥

घेंटी बाज डरौनी कड्ढै,
 राकश हर इक नसदा लब्भै।
 ध्यान जदूं अस मां दे बौहचै,
 टन टन घेंटी झट सनोचै।
 चन्द्र घेंटा बड़ी दयाल,
 केह् दस्सां में बेमसाल।
 करै भगतें दा मां कल्याण,
 त्रीए रूप दा करै जो ध्यान॥



मां चरणें च वास

चरणें बिच मेरा वास होऐ,
मन मेरा मां दा दास होऐ।

बिन मां दे किश मिं लब्धै निं,
मिं किश बी चंगा लगै निं।
रं'वै सदा दुआसी छाई दी,
हिरदे दी बेल कमलाई दी।
बिंद बर्खा दया दी होई जा,
बिंद पानी इसगी थहोई जा।
मिं म्हेशा मां दी आस होऐ,
चरणें बिच मेरा वास होऐ॥

मन मेरा कुतै बी लगदा निं,
हिरदे दा दीआ जगदा निं।
फही करना केह कुतै जाइयै,
मन ऐहमें अपना भरमाइयै।
की कुतै में अलख जगानी ऐ,
जदूं अपनी माता रानी ऐ।
मन कैहली फही दुआस होऐ,
चरणें बिच मेरा वास होऐ॥

हर मेरी गल्ल मनोंदी ऐ,
 मूंह मंगी चीज मिं थोंदी ऐ।
 मिं बिपता जदूं बी ओंदी ऐ,
 रूह मेरी जंदू घबरांदी ऐ।
 मां उस हालात च आई जा,
 बिगड़ी दी गल्ल बनाई जा।
 मिं मां दा अदूं एहसास होऐ,
 चरणें बिच मेरा वास होऐ॥

मां गी निं में भलाई सकदा,
 निं स्थान में कदे मकाई सकदा।
 निं थाहर नेहा मिं थोना ऐ,
 मां चरणें नेहा होना ऐ।
 मिं हू नै समझै लग्गी ऐ,
 मिगी असली दौलत लब्धी ऐ।
 जिसदे पर मिं विश्वास होऐ।
 चरणें बिच मेरा वास होऐ॥

मिगी सब किश मां ने दित्ता ऐ,
 उपकार मेरे पर कीता ऐ।
 नेई तां मिं कुसने पुच्छना हा,
 करी कोशश हक बी लुट्टना हा।
 मन किन्ना ऐ मेरा स्थान मंद,
 लुट्टेआ ऐ मां शा जिन्नै नंद।

मन की निं मां दा खास होऐ,
चरणें बिच मेरा वास होऐ॥

परेशान जदूं में होन्नां आं,
में मां दे दुआरै ढौन्नां आं।
जदूं त्रुटदे सारे स्हारे न,
दिनै लभदे अक्खीं तारे न।
अपने बी होन बगाने फही,
मौके पर मारन ताहन्ने फही।
ते धुंधला हिरदे गास होऐ,
चरणें बिच मेरा वास होऐ॥



अनन्य शक्ति

जेहदे बिच भाव लखोई जा,
मिं ओहकड़ा जादू थोई जा।

फही गीत में मां दे गांदा जां,
ओहदी म्हत्ता दरशांदा जां।
मां नेहा नमुल्ला मोती ऐ,
सभनें बिच जेहदी जोती ऐ।
करदी चतन्न जो सारें गी,
भूतें गी जंगल-जाड़ें गी।
सूरज गी नित्त जगांदी जो,
रस्ते च सनैहर बरूहांदी जो।
मन उसदै अर्पण होई जा,
जेहदे बिच भाव लखोई जा।।

सुर पक्खरूएँ दे ढलदी जो,
नदी-नालें छर-छर चलदी जो।
बिच चन्नै चाननी होंदी ऐ,
कदे तारें रात भरोंदी ऐ।
दिंदी ऐ लोऽ जो सारें गी,
ग्रैह चन्न, नखत्तर तारें गी।

सारें गी नींदर पांदी ऐ,
 जो बडलै नित्त जगांदी ऐ।
 उस मां दा संग मिं थ्होई जा,
 जेहदे बिच भाव लखोई जा॥

जो जगत चराचर सारा ऐ,
 मां दा गै सब नजारा ऐ।
 बनदी दिन, रात बनांदी ऐ,
 चन्न सूरज गास चढ़ांदी ऐ।
 ममता बिच जदूं भरोंदी ऐ,
 अदूं बदलें च बदलोंदी ऐ।
 साकार मां फुल्लें हसदी ऐ,
 होई सूखम खशबोऽ बसदी ऐ।
 मिं ओहदा सिरा फड़ोई जा,
 जेहदे बिच भाव लखोई जा॥

भौरें बिच गुनगुन लांदी मां,
 जदूं मिट्टी लोरी गांदी मां।
 सरस्वती मां बुद्धिमानें दी,
 मां लछमी ऐ धनवानें दी।
 ब्हारें बिच ब्हार बसैंती मां,
 नारें च नार सतबैंती मां।
 नदियें बिच एह मां गंगा ऐ,
 रूप एहदा रंग-बरंगा ऐ।

मन ओह्दै रंग रंगोई जा,
जेह्दे बिच भाव लखोई जा॥

जदूं राकश कैहर बरहांदे न,
सज्जनें गी कश्ट पजांदे न।
करदी ऐ अदूं नबेड़ा मां,
दुश्टें गी करियै नेड़ा मां।
दंद बिजली बनी करीचै मां,
दुश्टें गी फड़ी घसीटै मां।
अदूं सुनचै मां दी किलकारी,
जदूं ताण्डव करदे त्रिपुरारी।
उस मां दी शक्ति थोई जा,
जेह्दे बिच भाव लखोई जा॥



चौथा स्तव—कूष्मांडा

कूष्मांडा मां दा विस्तार,
लब्धै करदा जो थाहरो-थाहर।

मंद जेहदै मुस्कान समांदी,
मुस्काइयै ब्रह्माण्ड रचांदी।
पेठा फल जिसगी अत्त भांदा,
ओह् देवी ऐ कूशमांडा।
स्त्रिंशटी दा जदूं नेहा घेरा,
हर पाससै हा न्हेर-म-न्हेरा।
स्त्रिंशटी कीती अदूं साकार,
कूशमांडा मां दा विस्तार॥

आदि शक्ति मां आदि सरूपा,
देवें बिच खुआंदी अनूपा।
लोक जो सूरज बिच ऐ खास,
उस मंडल देवी दा निवास।
इस्सै देवी बिच ऐ शक्ति,
सूरज बिच निवास दी हस्ती।
तेजा दा करदी जो प्रसार,
कूशमांडा मां दा विस्तार॥

चमक सूरज दी जिस च होऐ,
 कु'न फही उसदे तुल्ल खड़ोऐ।
 आया निं कोई इत्थै देव,
 देवी आंगर लेइयै तेज।
 दिशाएं लोऽ बी मां दी लब्धै,
 जीवें तेज बी इंदा फब्बै।
 लोई दा मां जि'यां संसार,
 कूशमांडा मां दा विस्तार॥

बाह्मां इस देवी दियां अट्ट,
 शस्त्रास्त्र लेदे बक्ख-बक्ख।
 जिसलै मां चौथे दिन औंदी,
 अनाहत चक्र याद करांदी।
 करी लैओ इस मां दा ध्यान,
 होइयै मां दे तुस परायाण।
 फही जन्म होग निं बारम्बार,
 कूशमांडा मां दा विस्तार॥



कर्णाधार मैया

डुबदी निं ओह्दी नैया ऐ,
जेह्दी कर्णाधार मैया ऐ।

छाई जाह्न रस्तै न्हेरे बी,
दुख किन्ने होन घनेरे बी।
भाएं झुल्लन कैहर ते झक्खड़ बी,
पौंदे जाह्न किन्ने रप्फड़ बी।
जदूं अपनी मां खवैया ऐ,
डुबदी निं ओह्दी नैया ऐ॥

होंदी ऐ कुदरत नत्त मस्तक,
मां दिंदी जेह्दै बी दस्तक।
कुदरत ने ओह्दी मन्नी ऐ,
जेह्दे बिच श्रद्धा अ'न्नी ऐ।
नंद उ'ऐ असली लेइया ऐ,
डुबदी निं ओह्दी-नैया ऐ॥॥

ब्ला पानी अग पवै ठंडी,
जेह्दे नै होऐ मां चंडी।
जेह्दा बी मनोबल उच्चा ऐ,
हिरदे बी जेह्दा सुच्चा ऐ।

जो मां दी गोदा सेइया ऐ,
डुबदी निं ओह्दी नैया ऐ॥

कुदरत किन्नी बी नच्ची लै,
भाएं रूप भयंकर दस्सी लै।
मुकदा फही दुखें दा न्हेरा ऐ,
जदूं करदी मां सवेरा ऐ।
ना साढ़सती ना ढैया ऐ,
डुबदी निं ओह्दी नैया ऐ॥

माहनू डरपोक ओह् होंदे न,
जेह्ड़े रस्ते चा परतोंदे न।
श्रद्धालु कदें बी डरदा निं,
बिन मौती कदें बी मरदा निं।
मरदा जो दुबधा पेइया ऐ,
डुबदी निं ओह्दी नैया ऐ॥

आई रात मस्सेआ काली जा,
अम्बरै दा दीआ सहाली जा।
पर उस केह् न्हेरा पाना ऐ,
लोइया गी केह् नसाना ऐ।
आई बौह्दी जित्थै मैया ऐ,
डुबदी निं ओह्दी नैया ऐ॥

सब मां कोला लोऽ मंगै दे,
लेइयै दुएं गी बंडै दे।

लोऽ श्होंदी उसी नरैंतर ऐ,
जिस हिरदै नांऽ दा मैँतर ऐ।
जो मां चरणें च बेहिया ऐ,
डुबदी निं ओह्दी नैया ऐ॥

जेह्दै मां दा नांऽ समाया ऐ,
उसने गै सब किश पाया ऐ।
जिस विशें गी पुट्टी सु'ट्टेआ ऐ।
ओह् म्हेशां उप्पर उट्ठेआ ऐ।
जो मां दी शरणी ढेइया ऐ,
डुबदी निं ओह्दी नैया ऐ॥



मां दा संग

मिं अपना मां तुस देओ संग,
मोह-माया मेरी करो भंग।

मन इत्थै मेरा लग्गे नेई,
बिन तुं'दे किश मिं लब्धै नेई।
में धूड़ बनी जां चरणें दी,
निं र'वै फही चिंता मरने दी।
होई जाओ सज्जै-खब्बै मां,
मेरे पिच्छै बी ते अगै मां।
निं चढ़ै मेरे पर होर रंग,
मिं अपना मां तुस देओ संग॥

मन तुं'दे रंग रंगों'दा जा,
सब मनै मताबक हों'दा जा।
करां अपना में समर्पत मां,
तुं'दे बिच जीवन अर्पत मां।
फही जीवन सफल एह होई जा,
जे एहकी भावना थहोई जा।
फही खुशी बिच नच्चै अंग-अंग,
मिं अपना मां तुस देओ संग।

मन भाव अनन्य समाई जा,
 मां अन्दर मेरै आई जा।
 मन फुल्ल बनै उस श्रद्धा दा,
 जो मां दे चरणें सज्जा दा।
 श्रद्धा दी गंगा बगी चलै,
 मन नांऽ दी जोती जगी चलै।
 जे बनी जा एहका कदे ढंग,
 मिं अपना मां तुस देओ संग॥

भाएं झुल्लै झक्खड़ जां न्हेरी,
 बिन चप्पू चलदी जा बेड़ी।
 मां आपूं कर्णाधार होऐ।
 फही की निं बेड़ी पार होऐ।
 दुनिया बिच नांऽ फही होई जा,
 कन्नै जेकर मां खड़ोई जा।
 मन करै नेई फही होर मंग,
 मिं अपना मां तुस देओ संग॥



दया दी भिवख

मेरे औगुण मां भुलाओ तुस,
अपने हिरदे नै लाओ तुस।

में नीच आं अपनी करनी च,
आई पुज्जां तुं'दी शरनी च।
मेरी तुं'दे पर गै डोरी ऐ,
सद्कर्म दी पोथी कोरी ऐ।
हून डोबो तुस भाएं तारो मिं,
देओ जीवन भाएं मारो मिं।
अपने कश मिगी बुलाओ तुस,
मेरे औगुण मां भुलाओ तुस....

मिं होर कुसै दा सहारा नेई,
बिन तुं'दे मां मिं थाहरा नेई।
मिं तुं'दे हिरखै जड़ी लेआ,
में लड़ मां तुं'दा फड़ी लेआ।
बच्चा बिन मां निं रेही सकदा,
कुतै निं पल भर बेही सकदा।
अपने नै मिगी मलाओ तुस,
मेरे औगुण मां भुलाओ तुस॥

हुन वृत्ति कुतै निं लगदी ऐ,
 बिन तुं'दे जोत निं जगदी ऐ।
 में होर कुतै निं जाई सकदा,
 निं होर देव मनाई सकदा।
 जे हिरख मिं तुं'दा थोई जा,
 फही जीन सफल बी होई जा।
 मां अमरत पान कराओ तुस,
 मेरे औगुण मां भुलाओ तुस॥

ब्रह्माणी तुस जग मालक ओ,
 नारायण बी मां पालक ओ।
 तुस गै मां जग दी बाल्ली ओ,
 शंकर रूपा म्हाकाली ओ।
 बिन मां निं दुनिया पलदी ऐ,
 मां गै सब दुख-सुख झलदी ऐ।
 मां अपनी दया बर्हाओ तुस,
 मेरे औगुण मां भुलाओ तुस।



पञमां रूप—स्कंद माता

साधक जो चांहदा कल्याण,
मां स्कंद दा करी लै ध्यान।

ओह् ऐ कार्तिकेय दी मां,
स्कंद माता ऐ जिसदा नांऽ
बाल रूप च कार्तिकेय,
म्हेशां मां दी गोदा रेह्।
इस माता दियां बाहमां चार,
कार्तिकेय गोदी बशकार।
जिस देव दा मोर ऐ बाहन,
साधक जो चांहदा कल्याण॥

सज्जे हत्थ च बच्चा लब्धै,
खब्बै हत्थ कमल-फुल्ल फब्बै।
इंदा रंग ऐ चिट्ठा दुद्ध,
करै साधक दा हिरदे शुद्ध।
कमलै'र जो विराजमान ऐ,
पद्मासना सिंह बाहन ऐ।
करी लैओ इससै दा गुनगान,
साधक जो चांहदा कल्याण॥

विशुद्ध चक्र च बड़ा ऐ नंद,
 क्रियां बाहरलियां होन बंद।
 साधक इस कनै जदूं जुड़दा,
 चित्त वृत्तियें कोला मुड़दा।
 पद्मासना-लीन जदूं होऐ,
 कामनाएं शा छुट्टी थोऐ।
 कामनाएं दा मिटै नशान,
 साधक जो चाहदा कल्याण॥

चेहरे उप्पर आवै कांति,
 पलै च थोई जा उसी शांति।
 दुनियादारी जा उसी भुल्ली,
 दुआर मोक्ष दा जा फही खुल्ली।
 पंजमें रूप च जुड़ी जा मन,
 कार्तिकेय बी होन प्रसन्न।
 इस कोला बड़ा केहड़ा ध्यान,
 साधक जो चाहदा कल्याण॥



मां आदि शक्ति गंगा

तूं गंगा मां खुआ'रनी ऐं,
लोकें गी मां तूं तारनी ऐं।

मां शरण तेरी जो औंदा ऐ,
वत्सलता तेरी पांदा ऐ।
तूं ठंड कालजै पान्नी ऐं,
मां हिरखी निग्घ भखानी ऐं।
तूं पाप-मैल मां गोल्लनी ऐं,
ते अन्तर मन मां छोल्लनी ऐं।
करी पाप सुआह् डुआरनी ऐं,
तूं गंगा मां खुआ'रनी ऐं॥

बच्चे तेरे लेई सारे न,
भाएं चंगे न जां माड़े न।
सभनें दे भाग बनानी मां,
हर बच्चे ई तूं अपनानी मां।
सभनें गी तूं मां चाहन्नी ऐं,
नेह् इक्कै नेहा तूं लान्नी ऐं।
जगदम्बा मां खुआ'रनी ऐं,
तूं गंगा मां खुआ'रनी ऐं॥

जो कोल तेरै मां आई जा,
ओह् अपने भाग बनाई जा।

जग दा करने ई उद्धार मां,
 लेआ धरती तूं अवतार मां।
 स्त्रिंशटी दी तूं मां दाई ऐं,
 साकार तूं गंगा माई ऐं।
 तूं भागीरथी खुआ'रनी ऐं,
 तूं गंगा मां खुआ'रनी ऐं॥

निं भेद भाव तेरे अन्दर ऐ,
 तेरा हिरदा सुच्चा मंदर ऐ।
 करै फर्क निं तेरी अक्ख मां,
 नेई दिक्खै कुसै गी बक्ख मां।
 मां हिरख तेरे बिच अ'न्ना ऐ।
 नेई जिसदा कोई बन्ना ऐ।
 सब चंगे-मंदे स्हारनी ऐं,
 तूं गंगा मां खुआ'रनी ऐं॥

ध्यान जेहदा तेरै रौंहदा ऐ,
 उसदा स्नान नित्त होंदा ऐ।
 जो श्रद्धा दे बिच रुज्झी जा,
 बिन गेदे गंगा पुज्जी जा।
 ओहदी इक चलोहबी लक्ख बनै,
 बिन श्रद्धा लक्ख बी कक्ख बनै।
 श्रद्धा च दौड़दी जा'रनी ऐं,
 तूं गंगा मां खुआ'रनी ऐं॥



दाती मां

जिस घरै च मिलदा स्हारा ऐ,
मां, सच्चा तेरा दुआरा ऐ।

नेई रौंहदा कोई नरास तेरै,
होंदी ऐ पूरी आस तेरै।
मिं लभदा निं कोई दाता ऐ,
तेरे नेहा इत्थै माता ऐ।
सब तेरे दुआरै ढट्ठै दे,
भरने गी झोलियां नट्ठै दे।
सदा होंदा पार-तुआरा ऐ,
जिस घरै च मिलदा स्हारा ऐ॥

एह् भगत सकामी सारे मां,
जो बोल्ला दे जैकारे मां।
लखपति करोड़ जां अरबपति,
चांहदा ऐ भिक्खेआ मती-मती।
इत्थै औंदा हर सुआली ऐ,
हत्थ फड़ियै ठूठा खाल्ली ऐ।
नेई लभदा होर दुआरा ऐ,
जिस घरै च मिलदा स्हारा ऐ॥

एह जग सारा भिक्ख मंगा ऐ,
 नेई रज्जै भुक्खा-नंगा ऐ।
 लेई इक्कै हीखी लंघै दा,
 नत्त मस्तक होई मंगै दा।
 दिक्खै जदूं हालत माड़ी मां,
 दिंदी ऐ छप्पर फाड़ी मां।
 जिस रचे दा एह संसारा ऐ,
 जिस घरै च मिलदा सहारा ऐ॥

नेई दिंदी झूठा लारा मां,
 करदी सब दा निपटारा मां।
 जग थक्कै मंगी-मंगी नेई,
 मां अक्कै बंडुी-बंडुी नेई।
 कोई मंगै दा हत्थ कड्डियै,
 कोई आवै झोली अड्डियै।
 निं मंगनें गी कोई थाहरा ऐ,
 जिस घरै च मिलदा सहारा ऐ॥

मंगो तुस बेशक झक्को नेई,
 सुक्खन दी शर्त रक्खो नेई।
 जो कण-कण बिच मां बसदी ऐ,
 सुनी सुक्खन तुं दी हसदी ऐ।
 जिस आपूं मंगी खानी ऐ,
 उन्न सुक्खन केह चढ़ानी ऐ।

एह जगत् गै ओहदा सारा ऐ,
जिस धरै च मिलदा स्हारਾ ऐ॥



समर्पण पतर

जगदम्बे वैष्णो मां मनै च बसाना चाहन्नां,
शक्ति युक्त चि'नें कनै जेहड़ी सज्जी-धज्जीऐ,
छवि ओहदी अपने में हिरदे च तुआरियै,
दिक्खना निरंतर फही चाहन्नां रज्जी-रज्जियै।
साधु, सैंतें सज्जनें दा करने लेई उद्धार,
भूतें ते प्रेतें, राकशें गी जि'नें मारेआ,
उस्सै मां दा वात्सल्य भाव जदूं उच्छलेआ,
फसे मंझधार देवतें दा बेड़ा तारेआ॥

मां दी शक्ति अगै लब्धै कोई बी मसाल नेई,
गरुड़ हैंस मोर कुतै नंदी गण साहन ऐ,
मैहमामयी माता दा सबूत सामधाम दिक्खो,
सभनें थमां शक्ति युक्त मैया जी दा बाहन ऐ।
होइयै प्रभावत मैया गी अपनाने लेई,
अर्जी खुदगर्जी आहली अगै रक्खी कडिड्यै,
झटपट फटाफट मौका में सम्भालेआ,
शरणी मां दी पुज्जी गेआ सारे देव छडिड्यै॥

बाहन होऐ वृष जंदू रूप ऐ मातेश्वरी,
हैंसा दी सुआरी जदूं ब्राह्मी रूप धारदी,

माता रानी इ'नें सारे रूपें गी समेटियै
 शेरा दी सुआरी करियै दुष्टें गी मारदी।
 बखान करां माता दा में केहड़े-केहड़े रूपै च,
 हत्था च त्रिशूल फड़ी दुष्टें गी डराई सु'ट्टे,
 नस्सन निसाचर फही कल्लै दी दपैहर जि'यां,
 धनशा नै तीरें दी मां बरखा बर्हाई सु'ट्टै॥

कुमारी ब्रह्म चारिणी मां शेरा दी सुआरी जो,
 हिरदै बसेरा करै चित्त खंघलोई जा,
 मनै चा सफाया होई जा भलेआं विकारें दा,
 सिरै पर जेकर हत्थ मां दा रखोई जा।
 केई रंगें-रूपें बिच माता दा नजारा ऐ,
 ऐन्द्री दे रूपै च मां हाथी पर बौहदी लब्धै,
 बक्ख-बक्ख रूपें बिच छवि मां दी दिक्खी लैओ,
 वैष्णवी रूपै बिच गरुड़ सुआरी फब्बै॥

अग्गी बिच होऐ माहनू जेकर कोई जलै दा,
 जां युद्धै बिच होऐ दुश्मनै दे घेरे च,
 करदी मां बचाऽ बनी कवच सुरक्खेआ,
 होऐ की निं कोई घोर संकटै दे न्हेरे च।
 कम्म सारे करना म्हेशां मां गी याद करियै,
 भुल्लियै बी मां गी में कदें बी भुलांदा नेई,
 उस्सै बिच रौहन्ना-बौहन्ना उस्सै च बसोन्ना में,
 मां गी छोड़ी होर कोई देवता मनांदा नेई॥

हिरदे च बसाई मन लाई कोई दिक्खी लै,
 कष्ट-क्लेश, दुख-पीड़ माता नाशिनी ऐ,
 तुप्पने दी लोड़ नेई कुतै बी दौड़ी-दौड़ियै,
 चंड-मुंड धारिणी एह गृह-गृह निवासिनी ऐ,
 मनै दी मुराद माता मेरी मंजूर करो,
 मेरे मन मंदरै च मुड़ी होई जा मंगल,
 मारियै मकाओ माता दुष्टें ते द्रोहियें गी,
 मते चिर दुनिया च र'वै नेई जंगल॥

योग सिक्खने दी बिंद लोड़ मिगी पेई नेई,
 कुसै ने सखाया ना गै कुसै गी में दिक्खेआ,
 उस्सै पर सु'ट्टी ओड़ी जीवनै दी डोर फही में,
 बांह फड़ियै मां ने जो सखाया उ'ऐ सिक्खेआ।
 बनी मां चामुंडा दुख सभनें दे हरदी,
 धनश तलोआर त्रिशूल हत्थ खंडा ऐ,
 रूप महाकाली आह्ला युद्धै बिच धारियै,
 राकशें गी बड्ठेआ बनाइयै मूली गंढा ऐ॥

मन मेरा माता तुं'दे दर्शनें दा भुक्खा ऐ,
 महागौरी रूप धारी हिरदे च बस्सो मां,
 धन्न-धन्न होई जा मन भुक्ख त्रेह चुक्की जा,
 शक्ति अपनी दा मिगी चमत्कार दस्सो मां।
 दुखें आह्ला पतझड़ अन्दरा दा मुक्की जा,
 मनै च बनाई जाओ आइयै ब्हार बसैंत,

पंज भूत नस्सी जाहन त्राही माम् करदे,
मेरी वासनाएं दा उक्का-मुक्का होई जा ऐत॥

मां दी चेतन शक्ति नै गै सारें दा बजूद ऐ,
बिन ओहदी शक्ति दस्सो थाहर जेहड़ा खाल्ली ऐ,
बक्ख-बक्ख रूपें बिच निराकार वैष्णो मां,
सरस्वती लछमी ते कुतै बनी काली ऐ।
गल्ल इस लोक दी नेई त्रैवै लोक दिक्खी लैओ,
चन्न, तारे सूरज ते धरती भाएं गास ऐ,
अखंड ब्रह्माण्ड बिच उ'ऐ इक शक्ति ऐ,
कण-कण बिच जेहदा होए दा निवास ऐ॥

करियै बेशक दना गौर तुस दिक्खी लैओ,
त्रौनें लोकें बिच मैहमा मां दी गै लब्धै दी
बक्ख-बक्ख रूपै बिच बक्ख-बक्ख नां बेशक,
जगदम्बे मैया केई रूपें बिच फब्बै दी।
चमका दा ऐ सूरज बी जिस कोला लोऽ लेइयै,
चन्ना दी फही चाननी बी जिसने बनाई ऐ,
स्त्रिष्टी दा संचालन बी उ'ऐ शक्ति करै दी,
बह्मा, शिव, विष्णु च जेहड़ी फही समाई ऐ॥



छेमां रूप—कात्यायणी

कात्य-कुल च होए कात्यायण,

होई गे जो मां दे परायण।

मची ही सारे हाहाकार,

बधी गेआ जदूं अत्याचार।

महिषासुर ने कैहर बर्हाया,

धर्म गी जि'यां पुट्टी टकाया।

ब्रह्मा विष्णु शिव होए किट्टे,

तेज युक्त गुण मां गी दित्ते।

करी प्रगट फही कीता गायन,

कात्य-कुल च होए कात्यायण॥

लेआ फही देवी ने अवतार,

कात्यायण दी सुनियै पुकार।

इश्ट बनाई इ'नें पराम्बा,

पुत्री रूप घर आई जगदम्बा।

कात्यायण-धी बनी भवानी,

तां पेआ फही नांऽ कात्यायणी।

कात्यायण ने कीता ध्यान,

कात्य-कुल च होए कात्यायण॥

कृष्ण चतुदशीं देवी आई,
 कात्यायण ने खुशी मनाई।
 सतमीं, अठमीं, नौमीं आई,
 शुक्ल पक्ख दी चाननी छाई।
 त्रै दिन पूजा च उन्न लाए,
 अपने मनै दे भाव सनाए।
 रेह पूजा दे बिच कात्यायण,
 कात्य-कुल च होए कात्यायण॥

दिन फही दसमीं दा जंदू आया,
 महिषासुर गी मां ने ढाया।
 कीता उसदा कम्म तमाम,
 देवताएं गी लग्गा अराम।
 फल कात्यायणी दिंदी पक्क,
 इस बिच बिंद बी नेई शक्क।
 गीत गा'रदे ग्रैन्थ पुराण,
 कात्य-कुल च होए कात्यायण॥

रंग सुन्ने साहीं चमकदार,
 बाहमां सोभन इंदियां चार।
 अभय मुद्रा च हत्थ इंदा सज्जा,
 वरदान मुद्रा दे बिच खब्बा।
 सज्जै कमल-फुल्ल मां दे सज्जै,
 तलवार हत्थ खब्बे बिच फब्बै।

दुख फही सारे करन पलायन,
कात्य-कुल च होए कात्यायन॥

दुख हरदी नेई करदी देर,
बाहन ऐ इस मां दा शेर।
सांधक होंदा जदू समर्पत,
संब किश करदा मां गी अर्पत।
छे मां आवै जदू नरगता,
आज्ञा चक्र जोड़ै नाज्ञा।
पूरी चाल्ली होऐ पसयण,
कात्य-कुल च होए कात्यायण॥



मां दी लीला

सूरज, चन्न, तारे अम्बरै दी पंछान ऐ,
भौन मां वैशनो दा डुगगरै दी शान ऐ।

जंगलै च मंगलै दी उतररी बरात ऐ,
लगदा निं पता इत्थै दिन ऐ जां रात ऐ।
मां दुर्गमेश्वरी दी सारी करामात ऐ,
हर भूत प्राणी जेह्दे कन्नै प्राणवान ऐ।
भौन मां वैशनो दा डुगगरै दी शान ऐ॥

जम्मुआ च शैहर मां दा कटड़ा ऐ बस्सै दा,
दिनै-रातीं जगमग करी जेह्ड़ा हस्सै दा।
खुशी-खुशी हर माहनू जिस पाससै नस्सै दा,
बारां म्हीनें दुनिया दी पेई रौंहदी भान ऐ।
भौन मां वैशनो दा डुगगरै दी शान ऐ॥

शेरें आहली मां ने कमी बिंद बी निं छड्डी दी,
फ्हाड़ें बिच मन-मोहनी सोहनी झांकी कड्डी दी।
दौड़ी-दौड़ी ओंदे लोक दिखदे निं गड्डी गी,
मैह्मा नै भरोई गेदा धरत शमान ऐ।
भौन मां वैशनो दा डुगगरै दी शान ऐ।

कल्पना शा बाहर मां दी शक्ति दा संसार ऐ,
 लीला मां दी सज्जै खब्बै लब्भै थाहर-थाहर ऐ।
 म्हाकाली सरस्वती मां लछमी बशकार ऐ,
 लंगर बीर मां दे कन्नै-कन्नै हनुमान ऐ।
 भौन मां वैशनो दा डुगगै दी शान ऐ॥

फुल्ली-फुल्ली खुशी बिच फ़ाड़ बी पसोआ दे,
 रुक्खें-बूहटें ब्हानै रेही-रेही उच्चे होआ दे।
 दिक्खने ई नजारा बेहियै यात्रु बसोआ दे,
 भौन बझोंदा मां दा शक्ति दी खान ऐ।
 भौन मां वैशनो दा डुगगै दी शान ऐ॥

सभा सुर्ग लोक आहली धरती पर लगगी ऐ,
 सभा दे मझाटै मां बड़ी सोहनी फब्बी ऐ।
 बझोंदा जि'यां सामधाम अज्ज मां लब्भी ऐ,
 मां दी गै शक्ति साढ़े साहें च प्राण ऐ।
 भौन मां वैशनो दा डुगगै दी शान ऐ॥

साददा भेजी-भेजी मां ने भगत बुलाए न,
 दुहार छवि लैने ई रति कामदेव आए न।
 शलैपा दिक्खी सूरज ते चन्न शरमाए न,
 दिक्खियै लोगाई बी सारी अज्ज रहान ऐ।
 भौन मां वैशनो दा डुगगै दी शान ऐ॥

भवनै दे अन्दर ते गल्ल कोई खास ऐ,
 पुजदे गै होंदा शान्ति दा एहसास ऐ।

कीजे इत्थै सामधाम मां दा निवास ऐ,
 शक्ति युक्त गुफा दी बड़ी गै दिब्ब शान ऐ।
 भौन मां.....॥

छड्डियै गुफा गी मन करै नेई जाने गी,
 टुरी जाओ तां मुड़ियै फही मन करै औने गी।
 दिक्खने गी छवि माहनू तुपै मुड़ी ब्हाने गी,
 करने ई दीदार मां शेर जेहदा बाहन ऐ।
 भौन मां वैश्नो दा डुगारै दी शान ऐ॥

सुर्ग भाएं धरती 'र खुआंदा कश्मीर ऐ,
 ब रौंहदी श्रद्धालुएं दी वैश्नो दै भीड़ ऐ।
 घिस्ती साधु सैंत इत्थै लब्भै दा फकीर ऐ,
 थाहरें बिचा थाहर मां वैश्नो दा म्हान ऐ।
 भौन मां वैश्नो दा डुगारै दी शान ऐ॥

गर्मी-सर्दी लगगै ना गै थक्कनू ते हुट्टन,
 भावें नै भरोचे जैकारे मां दें उट्ठन।
 हिरखै च भरोइयै नंद सुर्गें दा लुट्टन,
 चढ़दे लै चढाई बच्चा, बुझा बी जुआन ऐ।
 भौन मां वैश्नो दा डुगारै दी शान ऐ॥

धूनी मां दी भौन पुज्जी भगत रमांदे न,
 भेटां गाई मां दे फही भाव च समांदे न।
 भावें च गै मां नै फही रिश्ता बनांदे न,

दिला बिचा उट्ठै फही भगतें दी तान ऐ।
भौन मां वैश्नो दा डुग़्गरे दी शान ऐ॥

दर्शनाभिलाषी जदूं किट्टे होई जाह्न
भावना च जदूं अक्खियां मटोई जाह्न
सुगैं दे तदूं सारे सुख थहोई जाह्न
भावना करांदी मां नै असली पंछान ऐ।
भौन मां वैश्नो दा डुग़्गरे दी शान ऐ॥

जदूं-जदूं हिरदै बसदी मां दी तस्बीर ऐ,
अक्खियें चा बगी पौंदा छमछम नीर ऐ।
हिरखी खरीदै मां गी उ'ऐ बड्डा मीर ऐ,
जेहदे बिच छल दा निं बिंद बी नशान ऐ।
भौन मां वैश्नो दा डुग़्गरे दी शान ऐ॥



शक्ति रूपा

जेह्दी कण-कण बिच नशानी ऐ,
ओह् जगदम्बे महारानी ऐ।

मेरे तन-मन बिच जो बौहड़ा दी,
मेरे साहें बिच बी दौड़ा दी।
जेह्ड़ी नींदर रातीं पांदी ऐ,
नित्त बडलै मिगी जगांदी ऐ।
भाएं उम्र बी सारी लगगी जा,
बस झलक ओह्दी इक लब्बी जा।
जेह्ड़ी वैष्णवी नारायणी ऐ,
जेह्दी कण-कण बिच नशानी ऐ॥

दीदार मिं जेकर होई गोआ,
में समझड़ सब किश थ्होई गोआ।
जेह्दी शक्ति हर थां लब्धै दी,
केई दक्खें बिच जो फब्बै दी।
जो सब दी जीवन शक्ति ऐ,
निराकार रूप बिच भक्ति ऐ।
उ'ऐ दुर्गा रूप भवानी ऐ,
जेह्दी कण-कण बिच नशानी ऐ॥

ओहदा सब नै इक्कै नाता ऐ,
 सभनें दी खुआंदी माता ऐ।
 मां सरस्वती इ'यै वाणी ऐ,
 करै राज दिलें जो रानी ऐ।
 देई शक्ति सब गी पालै दी,
 ढट्ठें गी जेह्ड़ी ठुआले दी।
 वर देइयै जो वर दायनी ऐ,
 जेह्दी कण-कण बिच नशानी ऐ॥

जेह्ड़ी शक्ति रूपा देवा ऐ,
 जो करै दी सब दी सेवा ऐ।
 जो करै संचालन शक्ति नै,
 जेह्ड़ी मिलदी सच्ची भक्ति नै।
 जिस सिरजे दा संसारा ऐ,
 मां रूप च बनदी स्हारा ऐ।
 उ'ऐ सीता राधा रानी ऐ,
 जेह्दी कण कण बिच नशानी ऐ॥

सदा चुकदी डि'गदे ढोंदे गी,
 देऐ स्हारा बच्चे रोंदे गी।
 दुख दर्द जदूं बी होंदा ऐ,
 बच्चे कोला मां गलोंदा ऐ।
 हिरख ओहदे च अनसम्भा ऐ,
 जेह्ड़ी साख्यात जगदम्बा ऐ।

तीरथ बिच गंगा पानी ऐ,
जेहदी कण-कण बिच नशानी ऐ॥

ना उस लेई चंगा मंदा ऐ,
कोई बी शैल जां गंदा ऐ।
ओह् रंग-रूप निं दिखदी ऐ,
छड़ी हिरखी भावें बिकदी ऐ।
जेहदै हिरखी बूहटा उज्जी जा,
ओह्दे दिलै च सिद्धा पुज्जी जा।
जेहड़ी दुर्गा मां कात्याणी ऐ,
जेहदी कण-कण बिच नशानी ऐ॥

पर्वत दी पार्वती पुत्री ओह्
छन्दें च छन्द गायत्री ओह्।
जो मंगो सो पूरा करदी ऐ,
सभनें दी झोली भरदी ऐ।
भरी झोली गरीबी खट्टी दी,
नेई होऐ बशर्ते फट्टी दी।
कु'न ऐसा दाता-दानी ऐ,
जेहदी कण-कण बिच नशानी ऐ।

बनी कंजक जे रस्तै आई जा,
बिगड़े दा कम्म बनाई जा।
मां सभनें दी जो बाल्ली ऐ,
करदी सब दी रखवाली ऐ।

श्री राम नै सोभै सीता जो,
 मां ग्रैंथें बिच ऐ गीता जो।
 उ'ऐ गिरिजा मां भवानी ऐ,
 जेहदी कण-कण बिच नशानी ऐ॥

जेहड़ी दुख-क्लेश बी हरदी ऐ,
 महाकाली दी पाई बरदी ऐ।
 जिन्नै मारे राकश उक्के हे,
 धरती'रा भलेआं चुक्के हे।
 जिन्नै महिषासुर गी स'लेआ हा,
 पैरें दे हेठ फही मलेआ हा।
 एह् कहानी अत्त परानी ऐ,
 जेहदी कण-कण बिच नशानी ऐ।

शुम्भ निशुम्भ दा करी सफाया,
 चंड-मुंड गी गलै च पाया।
 रक्त बीज दा रेहा निं नांऽ,
 मधु कैटभ हे गे कतांह।
 रुंड-मुंड होए सज्जै-खब्बै,
 दंदें बिच मां कुसै गी चब्बै।
 बनी शक्ति रूपा रानी ऐ,
 जेहदी कण-कण बिच नशानी ऐ।

सिर कुसै दा पेदा गब्भै,
 धड़ फही कुसै दा लड़दा लब्भै।

लत्त कुसै दी बांह निं रेही,
 अफरा-तफरी ऐसी पेई।
 त्राही माम् दी देन दुहाई,
 भैरो घाटी देऐ गुआही।
 तां शक्ति मां दी जान्नी ऐ,
 जेहदी कण-कण बिच नशानी ऐ।

लहुऐ दे कुतै चलन फुहारे,
 ढट्टन राकश लेई लुआरे।
 कुसै गी आवै नेही न्हेरनी,
 पवै चकोड़यै खाई घेरनी।
 दिनें उ'नेंगी लब्भन तारे,
 अक्खीं मली-मली दिक्खन सारे।
 आई चेता उ'नेंगी नानी ऐ,
 जेहदी कण-कण बिच नशानी ऐ।

सैंख बजाइयै हिरदा पाड़ै,
 तीर कुसै दी छाती ताह्ड़ै।
 घैंटी धुन मां करै डरौनी,
 बीती ही दुष्टें लेई होनी।
 हत्थें-पैरें राकश होई गे,
 महादेव जी रहान होई गे।
 शक्ति मां दी पन्छानी ऐ,
 जेहदी कण-कण बिच नशानी ऐ।

कोई लब्धै दा दौड़ै पेदा,
 कोई बतेहा भुंजां ढेदा।
 अ'न्ना कोई होइया काना,
 पता निं लगै कुद्धर जाना।
 महाबली बी थिड़दे लब्धन,
 किश मदानै रिढ़दे लब्धन।
 लेई बिपता मुल्लें जानी ऐ,
 जेहदी कण-कण बिच नशानी ऐ।



जगग जननी

चरणें मां मेरा थाहर होऐ,
मिगी शब्दे दा भंडार थोऐ।

नित र'वां में तुं'दी शरणी च,
अत्त नीच आं अपनी करनी च।
रुख मेरे गी तुस मोड़ी लैओ,
मिगी अपने नै फही जोड़ी लैओ।
मिं समझो किरपा दा पात्तर,
मिं लोड़ ऐ तुं'दी गै मात्तर।
में चाहन्नां बेड़ा पार होऐ,
चरणें मां मेरा थाहर होऐ॥

जे याद मां हिरदै बस्सी जा,
अन्दरा दा न्हेरा नस्सी जा।
जदूं लोऽ मां तुं'दी होई जा,
सूरज बी तदूं घरोई जा।
नित सं'जे-बडलै न्हौंदे लै,
सदा उठदे, बाँहदे सौंदे लै।
ओठें सदा तुं'दा नांऽ र'वै,
चरणें मां मेरा थाहर होऐ॥

इक बारी तन्मय होई जां,
 फही खुशी च भाएं बतोई जां।
 मेरे साहें तुं 'दा नांऽ चलै,
 सिर चरणे दी सदा धूड़ मलै।
 अक्खियें बिच मूरत ढलदी जा,
 झड़ी अत्थरुएं दी चलदी जा।
 मूहां भाएं किश बी निं खोए,
 चरणें मां मेरा थाहर होऐ॥

लगातार जपां में नांऽ माता,
 रातीं बी करां में जगराता।
 नांऽ तुं 'दा में बोल्ली-बोल्ली।
 चिंतन दी मधानी नै छोल्ली।
 नेई थक्कां नां गै हुट्टां में,
 छवि रूपी मक्खन तुप्पां में।
 फही होर निं भाएं किश थोए,
 चरणें मां मेरा थाहर होऐ॥

मां दे चरणें च जाइयै में,
 देह दीआ फही बनाइयै में।
 बत्ती में नांऽ दी बनाई लैं,
 हिरखै दा तेल बिच पाई लैं।
 फही अगग वियोगी छहोई जा,
 तां चानन सारै होई जा।

जे राह एहकड़ा पकड़ोए,
चरणें मां मेरा थाहर होए॥



जे राह एहकड़ा पकड़ोए,
चरणें मां मेरा थाहर होए॥
जे राह एहकड़ा पकड़ोए,
चरणें मां मेरा थाहर होए॥
जे राह एहकड़ा पकड़ोए,
चरणें मां मेरा थाहर होए॥
जे राह एहकड़ा पकड़ोए,
चरणें मां मेरा थाहर होए॥

जे राह एहकड़ा पकड़ोए,
चरणें मां मेरा थाहर होए॥
जे राह एहकड़ा पकड़ोए,
चरणें मां मेरा थाहर होए॥
जे राह एहकड़ा पकड़ोए,
चरणें मां मेरा थाहर होए॥
जे राह एहकड़ा पकड़ोए,
चरणें मां मेरा थाहर होए॥

जे राह एहकड़ा पकड़ोए,
चरणें मां मेरा थाहर होए॥
जे राह एहकड़ा पकड़ोए,
चरणें मां मेरा थाहर होए॥
जे राह एहकड़ा पकड़ोए,
चरणें मां मेरा थाहर होए॥
जे राह एहकड़ा पकड़ोए,
चरणें मां मेरा थाहर होए॥

सतमां रूप—काल रात्रि

काल रात्रि नांऽ मां तेरा,
रंग ऐ काला जि'यां न्हेरा।

खिल्लरे दे न मां तुं'दे बाल,
चमकै बिज्ज साहीं गल-माल।
चेहरे पर त्रै अक्खीं फब्बन,
ब्रह्माण्ड साहीं गोल जो लब्भन।
साह लब्भन मां दे इ'यां चलदे,
नक्क चा अगग दे लोरे बलदे।
दिक्खी सकन निं पापी चेहरा,
काल रात्रि नांऽ मां तेरा॥

दिक्खी लैओ इक होर नशान,
गधा ऐ पही इस मां दा बाहन।
मां सज्जे हत्थै नै वर दिंदी,
खब्बे नै मां निडर बनांदी।
त्रीए खब्बै लोहे दा खंडा,
चौथे हत्थ कटार ऐ नंगा।
रूप डरौना भाएं लग्गै,
शुभ फल देने गी मां अग्गै।

करदी दुष्टें गी सदा नेड़ा,
काल रात्रि नांऽ मां तेरा॥

शुभंकरी मां शुभ गै करदी,
दुखड़े भगतें दे मां हरदी।
उपमां मा दी ना कोई जोड़,
डरने दी केह भगतें ई लोड़।
साधक मां दा बड़ा ऐ खास,
सहस्रार बिच करै निवास।
दुख निं पांदे कदें बी फेसा,
काल रात्रि नांऽ मां तेरा॥

सुखै दी पौंदी अदूं फुहार,
खोहलन सिद्धियां बंद दुआर।
सतमें दिन दी करो पंछान
सहस्रार बिच रोको प्राण।
साधक इस चक्र जो बस्सन,
दानव दैत्य भूत सब नस्सन।
भगत जो भक्ति मां दी करदा,
अर्ग जल जैन्तु शा निं डरदा।
सुखें दा करदी मां सवेरा,
काल रात्रि नांऽ मां तेरा॥



मां दी मैहमा

मां तेरा मिगी सरूर होऐ,
मत्थै चरणें दी धूड़ होऐ।

हिरदे बिच नांऽ फही चलदा जा,
दीआ निशठा दा बलदा जा।
में करियै अक्खीं बंद सदा,
तेरी छवि दा लुट्टां नंद सदा।
नांऽ हिरदै तेरा बस्सी जा,
अन्दरै दा न्हेरा नस्सी जा।
मेरे अन्दर मां दा नूर होऐ,
मां तेरा मिगी सरूर होऐ॥

तेरी खड़ग चबक्खी चलदी जा,
अन्दरै दे पापी स'लदी जा।
पापी इक-इक बढोंदा जा,
खप्पर मुड़ी-मुड़ी भरोंदा जा।
पापी निं पाऽ कोई घेरा फही,
जदूं मां दा होऐ बसेरा फही।
मिगी मां पर फही गरूर होऐ,
मां तेरा मिगी सरूर होऐ॥

मां दे नांऽ दी पतवार होऐ,
 भांऽ बेड़ी पही मंझदार होऐ।
 मन विचलत बिंद बी होऐ निं,
 मिगी डर बी कुसै दा र'वै निं।
 मां रस्ता नेहा बनांदी जा,
 टुरी मंजल आपूं औंदी जा।
 कम्म मेरा सफल जरूर होऐ,
 मां तेरा मिगी सरूर होऐ॥

मेरी लोड़-थोड़ सब मुक्की जा,
 मेरी हीखी हर इक चुक्की जा।
 छड़ा हिरदै मां दा राज होऐ,
 पही खुश जां कोई नराज होऐ।
 जदूं सहारा मां दा सारें गी,
 केह् करना ऐ रिश्तेदारें गी।
 हस्सन जदूं कोई मजबूर होऐ,
 मां तेरा मिगी सरूर होऐ॥

खबरै की माहनू भुलदा ऐ,
 जाई थाहर-थाहर पही रुलदा ऐ।
 उसी लोड़ निं कुतै बी जाने दी,
 दुख जाइयै कुतै सनाने दी।
 पाई अक्खीं विशें दी लेतर तूं,
 आपूं होए दा मा-म्हेटर तूं।

दुख भोगै जेहदा कसूर होऐ,
मां तेरा मिगी सरूर होऐ॥

तूं सु'ट्टियै डोरी दिक्ख मड़ा,
उस नै होइयै इक मिक मड़ा।
ओह् आपूं सब किश करदी ऐ,
बच्चें लेई दुख सब जरदी ऐ।
जिन्न रोइयै उसी सनाया ऐ,
उसी मां ने गले नै लाया ऐ।
मिलै मां जे नेई फतूर होऐ,
मां तेरा मिगी सरूर होऐ॥



मां दा स्हान

निं मां में तुगी भुलाई सकदा,
निं तेरा स्हान चकाई सकदा।

ना मुमकन मुमकन करनी ऐं,
औंदा जो तेरी शरणी ऐ।
तूं पढ़ियै मनै दी भाशा गी,
करनी ऐं पूरण आशा गी।
तुगी लोड़ निं गल्ल सनाने दी,
भाशा गी शैल सजाने दी।
निं दस्सें झूठे दक्ख माए,
तूं करनी ऐं परतक्ख माए।

कु'न तेरे गुण गनाई सकदा,
निं मां में तुगी भुलाई सकदा॥
नेई दित्ते लारे-लप्पे तूं,
ना झूठे मत्थल ठप्पे तूं।
जो हिरख तेरे नै लांदा ऐ,
ओह स'रिआं तली जमांदा ऐ।
जेहड़ा बी मां तुगी जान्नी लै,
असलीयत गी पन्छानी लै।

मां उसगी गलै तूं लान्नी ऐं,
 गोदी बिच उसी खढान्नी ऐं।
 हिरख इन्ना कु'न लाई सकदा,
 निं मां में तुगी भुलाई सकदा॥

तेरे स्हान मेरे सिर जिन्ने न,
 गिनी सकदा नेई में किन्ने न।
 मेरा सब किश तूहें कज्जै दी,
 में करदा गल्ल निं पज्जै दी।
 हत्थ तेरै जेह्दी डोरी ऐ,
 तूं उसगी दित्ती लोरी ऐ।
 तुगी जानै बच्चा टामां गै,
 बच्चें गी जानेन मांमां गै।
 निं कोई कर्ज मकाई सकदा,
 निं मां में तुगी भुलाई सकदा॥

जिन्न हिरदै मां बसाई ऐ,
 उन्न सुगै छेज बछाई ऐ।
 जिसदे बिच भाव समर्पण ऐ,
 केह् करना उसने अर्चण ऐ।
 मां जेह्दे नै बी होंदी ऐ,
 दुनियां दी दौलत थ्होंदी ऐ।
 उसी लोड़ कुतै निं जाने दी,
 ना थां-थां तरले पाने दी।

ओह चांहदा ऐ जो पाई सकदा,
निं मां में तुगी भुलाई सकदा॥

मां जिसदे हिरदै बसदी ऐ,
उसी चमत्कार मां दसदी ऐ।
निं थ्होंदा जिसगी संग ओहदा,
कि 'यां दस्सी सकदा रंग ओहदा।
बिन दिक्खे जेहड़ा बोल्ला दा,
ओह मूर्ख पानी छोल्ला दा।
ओह खबरै केहड़ी आसा ऐ,
निं मक्खन थ्होना मासा ऐ।
इ 'यां ओह किश निं पाई सकदा,
निं मां में तुगी भुलाई सकदा॥



निराकार शक्ति (मां)

जदू-जदू बी सज्जनें गी दुष्ट घेरा पांदे न,
अत्याचार ढाड़्यै सुख-चैन ओह मुकांदे न।
पाप आहला न्हेरा जदू छांदा हिरदे-गास ऐ,
धमें दा पटोई जंदा जदू सत्यानास ऐ।

तदू-तदू गै रूप शक्ति बक्ख-बक्ख धारियै,
करदी ऐ सफाया दुष्ट राकशें गी मारियै।
ओह दिक्खो कि 'यां-कुत्थै किस रूपै बिच रौहदी ऐ,
शक्ति दा प्रतीक नारी रूपै बिच होंदी ऐ।

अग्ग, ब्हा, पानी, मिट्टी, गास पंज तत्त न,
पांडवें दे रूपै च जो लभदे बक्ख-बक्ख न।
शक्ति बनी द्रौपदी जो उंदे च समांदी ऐ,
भूत प्राणियें च शक्ति कुंडलिनी खुआंदी ऐ।
गर्भ देवकी चा जिन्नै कीती गास वाणी ऐ,
श्री कृष्ण बिच उ'ऐ शक्ति राधा रानी ऐ।
शक्ति श्री राम नै जो सीता बनी फब्बै दी,
उ'ऐ शक्ति शिव जी कन्नै पार्वती लब्बै दी।

बैठी दी जेहड़ी शेरा पर दुर्गा माता रानी ऐ,
नारायण बिच उ'ऐ शक्ति लक्ष्मी नारायणी ऐ।

जिस लेई न इक सब कोई निं चंगा-मंदा ऐ,
 तीरथै च उ'ऐ बगै बनियै मैया गंगा ऐ।
 गुनगान एहदा करदा रिग, यजु, साम ऐ,
 विराट रूप शक्ति दा प्रकृति सामधाम ऐ।
 चतत्र करै प्राणियें गी शक्ति एहदी लगातार,
 एहदे नै बजूद प्राणियें दा र'वै बरकरार।

सरस्वती मां स्त्रिंशटी ब्रह्मा रूपै च रचांदी ऐ,
 लछमी विष्णु रूपै च फही स्त्रिंशटी एह चलांदी ऐ,
 ते शंकर दा रूप जदूं काली मां बनांदी ऐ।
 धरती परा नांऽ-नशान भलेआं मटांदी ऐ।
 एहदे नै गतिशीलता एहदे बिना विराम ऐ,
 राम-परशुराम एहदे नै गै घनश्याम ऐ।
 अनादि शक्ति इ'यै इ'यै जीवना दा सार ऐ,
 अखंड ब्रह्मण्ड बिच फही जेहड़ी आर-पार ऐ।



अठमाँ रूप—महागौरी

अठमां जदूँ नराता औँदा,
मन महागौरी बिच समांदा।
शक्ति मां दी बड़ी अनमुल्ल,
रंग चिट्ठा जि'यां कुंद दा फुल्ल।
जां चिट्ठा जि'यां सैंख जां चन्न,
दिखदे होई जा मन प्रसन्न।
गैहने-कपड़े बी सब चिट्ठे,
चि'न्न में मां दे जिन्ने दिक्खे।
मन मस्ती बिच नचदा गांदा,
अठमां जदूँ नराता औँदा।
बाहमां इस शक्ति दियां चार,
म्हेशां बैल पर र'वै सुआर।
सज्जा हत्थ उप्परला अगगै,
अभयदान जो दिंदा लब्धै।
हेठ आह्ले सज्जै त्रिशूल,
करै नास दुष्टें दा समूल।
म्हौल चबक्खी खुशी दा छांदा,
अठमां जदूँ नराता औँदा॥

उप्परले खब्बै डमरू फब्बै,
वरदान दुए नै दिंदी लब्धै।

मां दी शक्ति ऐ शान्त सरूप,
 बेमसाल ऐ जिसदा रूप।
 पार्वती ही जदूं मां शक्ति,
 शिव लेई कीती मां ने भक्ति।
 तां गै हर कोई मां मनांदा,
 अठमां जदूं नराता औंदा॥

तुलसी ने बी फरमाए दा ऐ,
 रामायण च गाए दा ऐ।
 जन्म कोटि लागि रगर हमारी,
 बरउं संभु न त रहउं कुंआरी।
 इस रूप च जेहड़ा समांदा,
 मूंह मंगा फल म्हेशां पांदा।
 रूप एह सभनें दे मन भांदा,
 अठमां जदूं नराता औंदा॥
 कठिन तपस्या पेई मां राह,
 रंग फिरी गेआ काला स्याह।
 शिवजी ने प्रसन्न फही होइयै,
 गंगा जल कन्नै फही धोइयै।
 बिजली जन मां कीती गोरी,
 तां पेआ फही नांऽ महागौरी।
 जिसी सदा हर इक सरांहदा,
 अठमां जदूं नराता औंदा।



मैया गी साददा

मां अपनी अन्दर सद्द मना,
सद्भावें अज्ज तूं बज्ज मना।
जोती नै जोत जलाई लै,
मन मां चरणें बिच लाई लै।
इसी हर पासेआ मोड़ी लै,
मां कन्नै इसगी जोड़ी लै।
बनै भक्ति तेरा अंग मना,
होऐ मैया अंग-संग मना।
नेई दिक्खी-दिक्खी रज्ज मना,
मां अपनी-अपनी अंदर सद्दमना॥

बिंद भेदभाव निं रक्ख मना,
निं समझ कुसै गी बक्ख मना।
दिक्ख जात-पात निं रंग मना,
दिक्ख उसगी जो बेरंग मना।
जित्थै ऊंच-नीच निं चलदी ऐ,
उत्थै मां दी जोती बलदी ऐ।
उस मां गी अन्दर सद्द मना,
मां अपनी अन्दर सद्द मना॥

जे लहु सारें बिच सूहा ऐ,
 केह अपना फही केह दूआ ऐ।
 तूं बाह्‌रा मनै गी ढाई लै,
 ते फही अपने बिच लाई लै।
 आसन फही उच्चा होग तेरा,
 मन म्हेशां हौला रौह्‌ग तेरा।
 सुर्गें दा बनग सबब्ब मना,
 मां अपनी अंदर सद्द मना॥

भांऽ लफ्ज तूं बड्डे बोल नेई,
 धर्मै दी गुत्थी खोहल नेई।
 तूं करी लै नेक कमाई मना,
 फही होग तेरी सुनवाई मना।
 अमलै 'र होने नबेड़े न,
 चलने उपदेश निं तेरे न।
 बाकी भाएं सब किश छडु मना,
 मां अपनी अंदर सद्द मना॥

उत्थै जात-रंग ना चम्म मना,
 सद् कम्म गै औना कम्म मना।
 'एह गल्ल तूं गंढी ब'न्नी लै,
 कंध धर्म-जात दी भन्नी लै।
 तूं बंधन एह्‌के त्रोड़ी दे,
 ते द्वेष भाव बी छोड़ी दे।

फही मन्नग तुगी एह जगग मना,
मां अपनी अन्दर सद्द मना॥

जे चाहन्नां मां नै मेल मना,
हिरखै दा पाई रक्ख तेल मना।
हिरखी गै मां गी पांदा ऐ,
जो विरह च अत्थरू बगांदा ऐ।
उसी मिलना सज्जनो सौखा ऐ,
छड़ा हिरख गै लाना औखा ऐ।
हिरखै दी ब'न्न हां पगग मना,
मां अपनी अंदर सद्द मना॥

सदा मरदा मनै दा रोगी ऐ,
मन मारेआ जिस ओह योगी ऐ।
उसी पुन्न-पाप कोई थ्होंदा निं,
ओहदा जन्म-मरण बी होंदा निं।
मरदा जो देह गी फड़दा ऐ,
रूहै गी निं किश कोई करदा ऐ।
तूं मां दे गलै गै लगग मना,
मां अपनी अंदर सद्द मना॥

नफरत दा जैहर तूं घोली लै,
भां भरी पापै दी झोली लै।
माह्नू तेरे अपने सारे न,
एह फुल्ल ते भाएं डारे न।

कदें अपने पराए होंदे नेई,
 अन छड्डे थाहर छडोंदे नेई।
 नेई छट्ट तूं पाइयै छज्ज मना,
 मां अपनी अंदर सद्द मना॥

निरपक्ख मैया निश्कामी ऐ,
 त्रकड़ी बी उसदी सामी ऐ।
 जे होई उगड़ी-झिगड़ी जा,
 संतुलन कुदरत दा बिगड़ी जा।
 मन चित्र गुप्त मां दा चेला ऐ,
 पही स्हाब च कैहदा झमेला ऐ।
 कि 'यां होग पही घट्ट जां बद्ध मना,
 मां अपनी अंदर सद्द मना॥

समदर्शी जेहड़ा खुआंदा ऐ,
 हर माहनू गी जो चांहदा ऐ।
 करै भेद निं बंदे-बंदे च,
 ना चंगे ना गै मंदे च।
 दिक्खै राजा रंक फकीरें गी,
 इक्कै नेहा पत्थरें हीरें गी।
 ओहदी हद होऐ बेहद मना,
 मां अपनी अंदर सद्द मना॥

कदें साथ सच्च दा दित्ता नेई,
 कोई कम्म पवित्तर कीता नेई

कदेँ कीता नेई इन्साफ मड़ा,
 मन कि'यां होना साफ मड़ा।
 करी तीरथ किश बी होना नेई,
 लाई डुबकियां मन धनोना नेई।
 केह् करदे तीरथ-हज्ज मना,
 मां अपनी-अपनी अंदर सद्द मना॥

कुसै मनै नै मां गी जपेआ निं,
 ओहदे विरह च कोई तपेआ निं।
 कुसै अन्दर जोत जगाई निं,
 कि'यां आक्खै मां आई निं।
 जे चाहन्नां हासल करना लोऽ,
 तां ओहदे आंगर होइयै रौह।
 उस अगै झोली अड्ड मना,
 मां अपनी अंदर सद्द मना॥

कुतै पानी चेतन चेंचल ऐ,
 कुतै बर्फ बनी दी निश्चल ऐ।
 तत्त इक्कै दौनें बिच झलकै,
 ओहदा गै नूर सदा छलकै।
 भाएं जढ़ जां चेतन तत्त्व ऐ,
 ओहदी लीला दा गै म्हत्तव ऐ।
 इ'यै ईश्वर अल्ला रब्ब मना,
 मां अपनी अंदर सद्द मना॥

ओह अगल-बगल कोई भड़कै की,
 पानी बिच मछली तड़पै की।
 ओह रौंहदी ऐ सदा अंग-संग,
 छड़ा दिक्खने दा तूं सिक्ख ढंग।
 ओह कुसै थमां नेई दूर मना,
 कुस बिच नेई उसदा नूर मना।
 सभनें दी जेहड़ी जज्ज मना,
 मां अपनी अंदर सद्द मना॥

तूं करी लै बिंद क दान मड़ा,
 उत्थै होग तेरी पन्छान मड़ा।
 जो राहेआ उ'ऐ उगगना ऐ,
 सद्कर्मै गै उत्थै भुगगना ऐ।
 नेई चलनियां उत्थै गुज्झां न,
 यमदूतें मारनियां गुब्भां न।
 ऐहमें निं पाप तूं लद्द मना,
 मां अपनी अन्दर सद्द मना॥

जो करना ऐ तूं करदा निं,
 ते पाप-कर्म कोला डरदा निं।
 जींदे निं पुच्छेआ पानी ऐ,
 हुन बड़ै गी ढालें जानी ऐ।
 तूं करें श्राद्ध पर श्रद्धा नेई,
 कम्म मनै कन्नै करदा नेई।

कम्म पाप-पखंड दे छड्डु मना,
मां अपनी अंदर सद्द मना॥

इन्ना हिरख दुनियां बिच लाया,
फिरी-फिरियै तूं इत्थै आया
लक्ख चरासी जून ते भुगती,
मुक्ति दी नीं सोची युक्ति।
तेरे कन्नै कुसै नेई जाना,
खीर तोड़ी कुस साथ नभाना।
बेही मां चरणें बिच सज्ज मना,
मां अपनी अन्दर सद्द मना।

ओह भाव नगर बिच रौंहदी ऐ,
भावें बिच सौंदी-बौंहदी ऐ।
कम्म औने किश बी कम्म नेई,
भावें दा होग जे थ'म्म नेई।
शबरी दे बैर केहड़े सुच्चे हे,
छड़े भाव मनै दे उच्चे हे।
सिक्खी लै तु'म्मी चज्ज मना,
मां अपनी अन्दर सद्द मना॥

मां कोला उप्पर कक्ख नेई,
मां कोला किश बी बक्ख नेई।
चेतनता ओहदी गुआही ऐ,

सभनें बिच जेहड़ी समाई ऐ।
 सूरज गी बडलै ठुआलै दी,
 जेहड़ी जीव चराचर पाल्लै दी।
 तूं धारी लै उसी अज्ज मना,
 मां अपनी अन्दर सद्द मना॥

पंज ततें बिच जीवाणु ऐ,
 कुतै निराकार परमाणु ऐ।
 कुतै धड़कन ओह धड़का रदी,
 कुतै बनियै लहु चला र दी।
 प्हाड़ें सैलतन बदलें पानी,
 दरेआएँ गी देऐ रवान्नी।
 बदलें बिच पाऽ गड़गज्ज मना,
 मां अपनी अन्दर सद्द मना॥

ज्हारां, सूरज, ग्रैह नखत्तर,
 रौह्न चमकदे यत्र-तत्र।
 फही बी करन नेई इन्नी लोऽ,
 जिन्नी फही करी सकदी ऐ ओह।
 जे अपना ओह तेज खलारै,
 कदें निं कोई उसगी स्हारै।
 केह आक्खै उसगी अगग मना,
 मां अपनी अन्दर सद्द मना॥

कदें रूप बदल दा धारै दी,
 बनी सूरज धुप्प खलारै दी।
 कण-कण दे बिच ओह बस्सै दी,
 कुतै फुरलें बिच ओह हस्सै दी।
 जेहड़ा नश्वर जगत चलामां ऐ,
 सब उस्सै दा परछामां ऐ।
 तूं उस्सै गी फही भज्ज मना,
 मां अपनी अन्दर सदद मना॥

एह स्थूल जगत जो लब्धै दा,
 विराट रूप ओहदा फब्बै दा।
 एह सारी ओहदी माया ऐ,
 उस मोह दा जाल बिछाया ऐ।
 बिन फसे निं माहनू रेही सकदा,
 इस थमां मुक्त नेई होई सकदा।
 मोह सब थमां बड़डा ठग मना,
 मां अपनी अन्दर सदद मना॥

जीवें बिच जिसदी हलचल ऐ,
 ओह अजर, अमर ते निश्चल ऐ।
 पंज तत्त बी अमर खुआंदे न,
 होई किट्टे जीव बनांदे न।
 बिन इंदे जीवन चलदा नेई,
 जीवन दा बूहटा फलदा नेई।
 इ'थै रूह, मास ते हड्ड मना,

मां अपनी अन्दर सद्द मना ॥

तन लाए तूं भगमीं टल्ले न,
नेई भाव मनै दे छल्ले न।
लाई भगमें किश बी होना निं,
जो चाहन्नां ऐं ओह् थोना निं।
भाएं भेस बनाना सौखा ऐ,
भव सागर तरना औखा ऐ।
भव सागर समझ निं खड्डु मना,
मां अपनी अन्दर सद्द मना ॥

सारे सुख बी घिस्ती तूं छड्डे,
पंज भूत मनै चा नेई कड्डे।
लंघना हा जिद्धरा लंघेआ निं,
मन महामाई बिच रंगेआ निं।
जिस उसदी लोऽ गी दिक्खेआ ऐ,
उस असली जीना सिक्खेआ ऐ
ओह्दी जोती नै बलै जग मना,
मां अपनी अन्दर सद्द मना ॥

जलचर थलचर जीव चराचर,
जगत अगोचर जां फही गोचर।
देव लोक जां धरती उप्पर,
गास-पताल दी नुक्कर-नुक्कर।
चार-चफेरै उसदी माया,

कण-कण दे बिच रूप समाया।
तूं उस रूपै गी सद्द मना,
मां अपनी अन्दर सद्द मना॥

जंगल-जाड़ ते फ़ाड़ बी सारे,
धरती, सूरज, चन्न ते तारे।
छर-छर नाडू मारन आले,
नदियां-नाले बदलू काले।
एह लभदी सब उसदी लीला,
सोभै जिसदा अम्बर नीला।
हस्सै दरेआएं च झगग मना,
मां अपनी अन्दर सद्द मना॥

मन दूर विशें कोला धक्कना ऐ,
नेई रटना याद उसी रक्खना ऐ।
मन नेई जेचर उस बिच रुज्झै,
बाज तेरी नेई उत्थै पुज्जै।
होग बाज जदूं भाव भरोची।
बल्लें बी पही जाहग सनोची।
बिन भावें सब किश रद्द मना,
मां अपनी अन्दर सद्द मना॥

सुखनें दी एह कोठी तेरी,
सज्जना निरी मिट्टी दी ढेरी।
पाए सोचें दे जिस पर बाल्ले,

अक्खियां जिस दियां दौं परनाले ।
 लहु-मासा दा गारा लाया,
 लिम्बी-पोच्ची इसी टकाया ।
 भावें दा रक्ख दरग्ग मना,
 मां अपनी अन्दर सद्द मना ॥

ग्यान वान बड्डे-बड्डे तपस्वी,
 ऋषि-मुनि योगी ते मनस्वी ।
 छूही सके निं जिसदी छाया,
 भगत ध्यानू ने उसी पाया ।
 हिरख जो लांदा उसनै बंदा,
 लोक-लाज ओह भुल्ली जंदा
 नच्चै होई निर्लज्ज मना,
 मां अपनी अन्दर सद्द मना ॥

ब'ट्टें दे केई शिवलिंग ज्हरां,
 कुल देवी सतबैंती नारां ।
 ब'ट्टें बिच बसदे न भगवान,
 देन भाव जदूं जीवन दान ।
 भाव जगांदे श्रद्धा-भक्ति
 भाव गै करदे जागृत शक्ति
 तूं भाव नदी बिच बग मना
 मां अपनी अन्दर सद्द मना ।

एह प्राणी सारे मनके न,
 ओहदी माला च जो बनके न ।

बिच तंद साहें दी फेरी ऐ,
 त्रुटदे गै मिट्टी दी ढेरी ऐ।
 पत्तरें पर त्रेलू दे मोती,
 इ'यां क्षणिक बलै जीवन जोती।
 सदा ओहदी गै जगमग मना,
 मां अपनी अन्दर सद्द मना॥

कु'न अपना कु'न पराया ऐ,
 तेरी समझै बिच निं आया ऐ।
 कुतै अपना समझी डु'ल्ला नैं
 कुसै ई समझी पराया भुल्ला नैं
 इत्थै तेरा अपना इक नेई,
 तूं कुसै ई पराया दिक्ख नेई।
 किश सोच तूं कर निं हद मना,
 मां अपनी अन्दर सद्द मना॥

जिस आत्म रूप ओह प्राया ऐ,
 आई समझै ओहदी माया ऐ।
 उसी दुख दुआस निं करदा ऐ,
 कोई सुख सुआस निं भरदा ऐ।
 ओह इक रस होइयै जींदा ऐ,
 जीवन दा अमरत पींदा ऐ।
 तु'म्मी पीऽ लै अमरत अज्ज मना,
 मां अपनी अन्दर सद्द मना॥



नांS दा नशा

मां र'वै सदा मेरे अंग-संग,
में ऐसा होई जा अंतरंग।

मन मंदर म्हेशां जोत बलै,
कम्म मेरा अपने आप चलै।
नशा र'वै चढ़े दा नेहा फही,
करी रक्खै मिगी बदेहा फही।
मिगी र'वै खबर निं इक पल दी,
दुनिया बिच कुसै बी हलचल दी।
में म्हेशां र'वां बेहोशी च,
धिक्कार जे आई जां होशी च।
मेरे पर चढ़ी जा नेहा रंग,
मां र'वै सदा मेरे अंग-संग।

इस लोक च र'वां में सुत्ते दा,
मैया दे लोक बिच उट्ठे दा।
नींदर मिगी नेही पेई जा,
हर त्रिशना मेरी सेई जा।
अद्ध चेतन मेरा मन होऐ,
उस लोक च सदा चतन्न र'वै।
भगती दी नदी बिच न्हौंदा जां,

में मैल मनै दी धोंदा जां।
लांऽ गोते में मां बनै गंग,
मां र'वै सदा मेरे अंग-संग।

नेही नशे दी सुस्ती छाई जा,
मेरी नस-नस बिच समाई जा।
मिगी होश जिंदू दी भुल्ली जा,
त्रीऽ अक्ख फही मेरी खु'ल्ली जा।
मेरा सुखना सच्चा होई जा,
जो चाहन्नां ओह मिगी थोई जा।
होशै दे नरक थमां नस्सी जां,
जाई सुर्ग लोक बिच बस्सी जां।
निं र'वै बकाया कोई मंग,
मां र'वै सदा मेरे अंग-संग॥

फही नींदर मेरी खु'ल्लै नेई,
ते नशा बी मेरा उ'ल्लै नेई।
नेही चढ़ी दी र'वै खमारी मिं,
नेई विशें दी र'वै बमारी मिं।
विकार कोई अन्दर उज्जै निं
मनै तोड़ी वासना पुज्जै निं।
फही खुशी दा पर्व मनाई लैं में,
मां कन्नै हिरख बधाई लैं में।
मेरा नच्चै खुशी च अंग-अंग,
मां र'वै सदा मेरे अंग-संग॥

घर मिगी बेहोशी करदी जा,
 ते दुख मेरे सब हरदी जा।
 फही अमरत बर्खा ब'री चलै,
 कमरे बिच गिल्ला करी चलै।
 एह कदें बेहोशी मुक्कै नेई,
 मेरी तार जुड़ी दी त्रुट्टै नेई।
 केह् करना होश च आइयै में,
 ते अपनी होश गुआइयै में।
 जित्थै र'वै विशें दी सदा जंग,
 मां र'वै सदा मेरे अंग-संग।

मन सदा नशे बिच दुत्त र'वै,
 इक्कै नेही जित्थै रुत्त र'वै।
 ना गरमी-सरदी तंग करै,
 ना जीवन कोई मंग करै।
 फही किशती आर जां पार होऐ,
 जदूं मां दे हत्थ पतवार होऐ।
 हर लिस्सी मनै दी आस पवै,
 इन्द्र बी अदूं दुआसा होऐ।
 निं कदें बेहोशी होऐ भंग,
 मां र'वै सदा मेरे अंग-संग॥

लगातार बेहोशी चलदी जा,
 अन्दरै दे पाप ओह् स'लदी जा।

मन बिंद बी थक्कै-हुट्टै नेई,
 ते अक्ख बी अपनी पुट्टै नेई।
 हुन देओ भांऽ लालच इसी लक्ख,
 बिन मां दिक्खै नेई होर दक्ख।
 एह् अमरत बूदां पींदा जा,
 फही असली जीवन जींदा जा।
 दब्बियै जीने दा लुट्टै नंद,
 मां र'वै सदा मेरे अंग-संग।



नौमां रूप—सिद्धि दात्री

सिद्धियां सब न मां दे कोल,
सिद्धि दात्री दी जै बोल।

सब सिद्धियें दी मां ऐ मालक,
स्त्रिंशटी दी बी जो ऐ चालक।
अणिमा, महिमा, लघिमा आदि,
देइयै हरदी आदि-व्यादि।
नौमैं जदूं नराते औंदी,
सिद्धि दात्री अदूं खुआंदी।
रखदी म्हे शां पूरा तोल,
सिद्धियां सब न मां दे कोल॥

किरपा जदूं ही मां दी होई,
सिद्धि हर इक शिव गी थोई।
अद्धा, देह् देवी दा थोआ,
अर्द्धनारीश्वर शिव फही होआ।
मां दी मैहमा बड़ी ऐ म्हान,
इंदे नै गै शिव भगवान।
भक्ति ऐ मां दी बड़ी अनमोल,
सिद्धियां सब न मां दे कोल॥

बाहमां जिस शक्ति दियां चार,
 भगतें नै ओह करदी प्यार।
 कि'यां पेई जा उस थां न्हेर,
 बाहन ऐ फही जिस मां दा शेर।
 हेठले सज्जै चक्र मां धारै,
 खब्बे हत्थ नै गदा लुआरै।
 भगत पुकारै करै मां तौल,
 सिद्धियां सब न मां दे कोल॥

खब्बा सेंख ऐ हेठले फब्बै,
 कमल-फुल्ल उप्परले लब्भै।
 जेहड़ा ऐ इस रूप दा साधक,
 उस लेई किश निं बनदा बाधक।
 उसदे बिच समर्था आई जा,
 ओह ब्रह्माण्ड दे बिच फही छई जा।
 सब किश आई जा उसदे कोल,
 सिद्धियां सब न मां दे कोल॥

जिस-जिस ने बी मां गी ध्याया,
 इच्छ रेही निं कोई बकाया।
 सिद्धि दात्री शक्ति ऐ खीर,
 सिद्धि-सम्पन्न बड़ी अमीर।
 पूजा मां दी जेहड़ा करदा,
 खुशियें कन्नै झोली भरदा।

नेई करदी मां टाल-म-टोल,
सिद्धियां सब न मां दे कोल॥





डॉ० बंसी लाल शर्मा

- नाम : डॉ० बंसी लाल शर्मा
- जन्म तिथि : 2 दिसम्बर 1956
- जन्म स्थान : अखनूर
- माता-पिता : स्व० श्रीमती राजकुमारी ते दीवान चन्द शर्मा ।
- व्यवसाय : प्रिंसीपल रिटायर्ड (शिक्षा विभाग)
- पता : संतरा मोड़ (पौनीचक) पो० ऑ० अकलपुर, जम्मू
- फोन नं : 0191-2650811 (मो.) 94197-89332
- रचनां : 1. डोगरी-हिन्दी तुलनात्मक अध्ययन (शोध प्रबन्ध)
 2. अज्जै दा डोगरी साहित्य : इक संपादक
 3. दिक्खो ते सिक्खो : डोगरी कविता संग्रह
 4. श्रीमद् भगवद् गीता (पद्यानुवाद)
 5. डोगरी कविता : इक संपादक
 6. सुर्गी नायिका : डोगरी कविता संग्रह
 7. प्रो. लक्ष्मी नारायण शर्मा : व्यक्तित्व ते कृतित्व
 8. समर्पण पत्र : कविता संग्रह (तुं 'दे हत्थै च)
 9. उद्धव शतक : डोगरी पद्यानुवाद
 10. भाशा विज्ञान ते साहित्यालोचना सरबन्धी शोध लेख, निबन्ध ते कवितां आदि मौलिक रचनां ।